

Atham woMarkkoc  
Lon iloporot loKapik ammakka oMarkkoc  
pokurrot  
Lon lonothon

Atham enni waMarkkoc akkokat pokurrot, ipokat pinako cakuruk ngk'ran itti oIuanna oMarkkoc. Kwokat popu'rit ca'ri ica oIeccuo pokat noka'ran koUruccelim, ana kwothakkakathe pul ipammakot oIeccuo. Kwokat akwommakot pul pothothilettat poIeccuo oPoluc ana kwittarathe oPoththuruc. Ilon elli lothikkoik thoIeccuo, kwere lon loppot loul woIouth ana thathuma then ittina. Likkoik ere kwokurrot lon len othakka itti akwittarot ul iokat wannoka woIouth occokot lon loMiccie.

Iatham enni, oMarkkoc perenthet ton lon ila oIeccuo pokkothe kannan nolon ila kweret. Oron thakatha tat akka oIeccuo pokkothe lon ilommaththik loppot, kwittiethe ul woppot, ana okicce pu'ran pou'rupa iokithak nti iakin ana occikinthe kin lon len ilokithak. Lon elli lakene ngili ngoIeccuo ammakka pul ipaat noKapik. Akwethet thikkoik thung akwelikko nti ipu'ran polon ilokithak.

OMarkkoc pereneron lon lothikkoik thoIeccuo ana ngre ngung nci ammakka kwoccot mamuthie nti ikkun woIuanna. Kwereneron kicce lon ilocothothe akkwarthuk okkwettat nothapak, ana kwacothot lon lung ntheret thuroko thoIeccuo nti ithio ana thuku'rot thoIeccuo tothi'rot cakuruk.

*OIuanna pomamuthie pakuccet kathar cik  
(Maththa 3.1-12; Lukka 3.1-18; Iuanna 1.19-28)*

<sup>1</sup> Thoku're lon nci tholon iloporot loIeccuo oMiccie, ukul woKapik.

<sup>2</sup> Lokurrakot iatham woIccaia pul pothernte lon loKapik itti,

“Mpathiöt pul pothothilettat pin tokit kang,  
ook ipathokuccenthung kathar cik.”

<sup>3</sup> “Po're popul paik pakkakkaro nti ithampang itti,  
'Nokuccenthet Ili kathar cik,  
noce'renthok athar cik.’”

<sup>4</sup> Ittina oIuanna pomamuthie pakkakathe akwikket ul mamuthie ithampang ithonthomat ana akwongkene ul lon lomamuthie mothokkaprttako nti ilon ilokithak ana thoccikarnthet lon ilokithak. <sup>5</sup> Ana nci cınang ul wonoththok poIouthia appik ana wonoka'ran koUrucelime woingkanthok, ana okin thokat akin itto lon len ilokithak akinocco mamuthie nti ikkun wung norue toÜrüthün. <sup>6</sup> OIuanna pakukkot eret wokkattathe norua tothamla ana i'rikakot ku'rat ikin ana kwokat cik akwikikko aun ana o'rko kat. <sup>7</sup> Ana akwerene ul itti, “Pul paik panthan ponu pu'ran priik naun ana mpakannekkonan manna itti mpee ungu nci tokit kung anak'ro lo'rak lowok wung. <sup>8</sup> Mpethet non mamuthie ngng'ri, anaruk kwathethet non ngKanang ikupupure.”

*Mamuthie ana thennekketta thoIeccuo*  
(*Maththa 3.13–4.11; Lukka 3.21–22; 4.1–13*)

<sup>9</sup> Ana noma'ri men oIeccuo pakkakathe nnoka'ran koNaccir noththok poCelil, ana oIuanna pekathok mamuthie irue toÜrüthün. <sup>10</sup> Anakka oIeccuo pokat cik akwoppot thapat nti i'ri, akwimmakat tothi'rot attanyattatheik ana Kanang ikupupure akorpok cik naak karkko cülökkür. <sup>11</sup> Ana po're pakkakathe nci tothi'rot api're itti, “Oung ukul win, ia mpongothe ana mpopiranet noka.”

<sup>12</sup> Nci cınang Kanang koKapik kothithok ithampang ithonthomat, <sup>13</sup> ana kwikkatheik than ma'ri arrial we'ra

(40), apul pothopulut ennekkek, ana kwokat cik na'rupu woripira ana u'rupa wothothilettat woKapik wakkakathe ana wittarathok.

*Thakkaro thoul worokit iammakothok*  
(*Maththa 4.12-22; Lukka 4.14-15; 5.1-11*)

<sup>14</sup> Manakka oluanna ponekkettathe ikorrkkor, oIeccuo poingkathe noththok poCelil, akwongkene ul lon iloporot loKapik. <sup>15</sup> Kwi'rekathe itti, "Ca'ri caat ana ngili ngoKapik ngakko napuththut ana nthapa'rine lon ilokithak cik annocokot lon loKapik iloporot."

<sup>16</sup> Anakka oIeccuo pokat cik akwokko nokuthut korok irapangka toCelil, akwimmakat oCamaan ana opang Anthrauc akin orre lo'rok lape irok irapangka, akka okin thokat ul iaccicokot ape. <sup>17</sup> Ana oIeccuo pi'rekathekin itti, "Nanthan, annomakothin ana mpathikkienon ul iaccicokot ul ionyi." <sup>18</sup> Akin oththekat nolo'rok len lape akin omakathok accokkot.

<sup>19</sup> Anakka kweot papotteik, akwimmakat oIakup ukul woCepethi ana opang oluanna akin thokat cik ikuppu'rung konoi'ri akin okucet lo'rok len cik lape. <sup>20</sup> Ana kwakkarathekin cokocokot ana okin thoththekathe naththan pen oCepethi ikuppu'rung konoi'ri okin oul iporekinok ana okin thomakathe oIeccuo.

*OIeccuo pakicce u'rupa iokithak nti ipul*  
(*Lukka 4.31-37*)

<sup>21</sup> Ana okin thoingkathe noka'ran koKapprnaum, anakka ca'ri caCcepith caat, oIeccuo poingkathe nocuththun ca'rama ana kwikkatheik akwongkene ul. <sup>22</sup> Ana ul wokat cik aprttakinthet thongkene thung tit, akka kwangkenekin ere pul iponu ngili, annoka ammakka ul iangkene lon lothonce'ret lon cik. <sup>23</sup> Ittina apul p'rek akkakat nocuththun ca'rama iponat u'rupa iokithak

api'rekat lon mpo're cittan itti, <sup>24</sup> “Ngintha akka akkot nanin, Ieccuo poNaccir? Ngkwaat itti ngkwathongwo nini? Mpina itti ounge okkwen, ounge ipupure poKapik.”

<sup>25</sup> Ncinang aleccuo othirriekathok cik akwi'rekathok itti, “Angkik, oppothe thapat nti iaak.” <sup>26</sup> U'rupa iokithak wolliekathe pul ikapa ana wekathe po're cittan ana wopathe thapat nti ipul.

<sup>27</sup> Ul appik woprttakatherit, ana okin thikkatheik akin ipittarat itti, “Nginthappu empi? Thongkene enthi thie ana nnggili. Akka manna kwangkie u'rupa iokithak cik, accikathok.” <sup>28</sup> Alon lung opettakat cik noththok poCelil appik.

*Oleccuo pittiet ul woppot*

*(Maththa 8.14-17; Lukka 4.38-41)*

<sup>29</sup> Manakka oleccuo ana ul wung thothehet nocuththun ca'rama, okin thoingkathe akin olakup ana oluanna thoC-camaangon ana thAnthraucon. <sup>30</sup> Ana opithe poCcamaan iopopari pokat ia'rangkal akkwongo akwangko ippa, ana okin therekanthet oleccuo lon lung. <sup>31</sup> Ana oleccuo poingkanthok akwocokathok ukun akurokiekathok kapik. Lü lopa'ratheik nti iaak ana kwikkatheik akwokkinthet kin thu'rit.

<sup>32</sup> Ana cipin cen akka cingki corungkot, ul wonakanthet oleccuo ul iongo appik ana ia u'rupa iokithak wo'rot nan. <sup>33</sup> Ul wonoka'ran appik wa'rntakathe tocürük, <sup>34</sup> ana oleccuo pittiekathe ul iongat mmio kurekkurek. Kwokiccekathe u'rupa iokithak woppot anaruk kwakanno okorronnat u'rupa iokithak itti were akka okin thinat itti ook okkwen.

*Oleccuo pangkene noththok poCelil*

*(Lukka 4.42-44)*

<sup>35</sup> Ana ingi'rīmak nothuput thorrot akka cik cokat carthuk okatto, oIeccuo purokathe nti inthe ana kwoththekathe nokaman ana kwoingkathe noka'ran pellek na kwaththa'rat nga'rama. <sup>36</sup> Ana oCamaan ana opurukon thoingkathe akin othokwariccathok. <sup>37</sup> Manakka okin thiothok akin i'rekathok itti, “Ul appik waik wakwariccathung.”

<sup>38</sup> OIeccuo pothiānthe kin tit itti, “Ntun anteo nocik c'rek iccik kokaman ikaik cene anothongkene ul than cakuruk akka ilen akka mpainet.” <sup>39</sup> Ittina kwoingkathe noththok poCelil appik akwongkene ul nomuththun ma'rama. Ana akwokicce u'rupa iokithak nti iapilingon.

*OIeccuo pittiet pul iponat ñnyĩ noka  
(Maththa 8.1-4; Lukka 5.12-16)*

<sup>40</sup> Apul p'rek akkakanthok ponat ñnyĩ noka apeekat ungu nci apippattathok itti, “Amma oung akkongothe ana ngkwittiethin.”

<sup>41</sup> OIeccuo pipathe thiak thung akwothiekat ukun akwothntat pul akwi'rekat itti, “Mpongothe itti mpittiethung, othakka poporot.” <sup>42</sup> Nci cīnang aĩnyĩ ittakat accokkot ana kwothakkakathe poporot.

<sup>43</sup> OIeccuo pothiāthok ikathar llon lonthomat akwi'rekathok itti, <sup>44</sup> “Amma ngkweot akorronno i'ret pul p'rek lon elli. Anaruk ngko athokene pul ponopan toKapik ka kang, akiat papu pothokiot ngüccük cik ammakka oMucca pi'ret akenekin itti ngkwothakkat poporot.” <sup>45</sup> Anaruk kwoingkathe ana kwikkatheik akwere nuthuk ana opettot lon cik ana ittina oIeccuo pommakathe i'riko icarak coman ncinokkīt anaruk kwikkatheik thomnther. Ana ul wokat cik warthuk aukkwīnok nci nomo'rong ammakka maik.

## 2

*Oieccuo pittiet kimico**(Maththa 9.1-8; Lukka 5.17-26)*

<sup>1</sup> Ana noma'ri motte akka oieccuo popakkothe attang noka'ran koKapprnaum, ul woccikathe itti kwokkaprt-takot ntan tuan. <sup>2</sup> Ittina ul wakkakathe tocürük woppot ana cik cellakathe icokwentakot manna nocürük thapat. Ana kwikkatheik akwongkenekin. <sup>3</sup> Ana ul w'rek iomura woco'rin wakkakathe anneko pul ipakimico ana won-akanthok. <sup>4</sup> Okin thakanniat kathar ikakin onekkethok ngngin tokit koleccuo akka ul wokat cik woppot ana okin thanyathe man nto'ra akin orpekat pul na'rangkal ia kwokat cik akwīcat cik nan tokit koleccuo. <sup>5</sup> Anakka oieccuo pimmat thocokot tholon loKapik nomikit men akwi'rekat pul ipakimico itti, “Ukul, lon lang ilokithak loccikakothe.”

<sup>6</sup> Ana ul w'rek iangkene lon lothonce'ret lon cik wokat cik aikkoik cīnang akin eret nomikit men itti, <sup>7</sup> “Pul empi pontha akka apere ittina? Kwaik pacungkwoik, pul pella ipaccikinthe ul lon ilokithak, Kapik kulluk akkaccikot.”

<sup>8</sup> Oieccuo pinakathe nolon len ngka kung accokkot ilakin thokat cik akin okwarttikot nomikit men ana kwi'rekathekin itti, “Ngintha akka annokwarttikinthe lon elli ittina? <sup>9</sup> Lon liatha akkoporot, itti mpi'ret pul ipakimico itti, ‘Lon ilokithak lang loccikakothe,’ ana amma okorronno oka menik mpi're itti, ‘Urokothe kapik aneko a'rangkal wang aei?’ <sup>10</sup> Anaruk elli othakka itti annina itti ukul wopul iponyi wonu pu'ran nocapu itti waccikinthe ul lon ilokithak.” Kwi'rekathe pul ipakimico itti, <sup>11</sup> “Mpi'rethung itti, urokothe kapik aneko a'rangkal wang aeo tuan.” <sup>12</sup> Menik apul ipakimico urokat kapik aponekat a'rangkal wung apoingkat thapat tokit ken ap-pik. Elli loprttakiekathekin tit ana okin thopirakanthe

Kapik noka akin i're itti, “Oniñ thakinnimma lon ca'ri c'rek ammakka elli.”

*Thakkaro thoLau*  
(*Maththa 9.9-13; Lukka 5.27-32*)

<sup>13</sup> Ca'ri c'rek cakuruk aleccuo oingkat iccik korok. Acungkut coul akkakanthok ana kwikkatheik akwongkenekin lon loKapik. <sup>14</sup> Anakka kwokat cik akweo, kwimmakathe oLau ukul wAlappaoc aikkoik noka'ran koul ia'rntintheit nili akucci. Aleccuo i'rekathok itti, “Omakothin.” Ana oLau purokathe kapik ana kwomakathok.

<sup>15</sup> Anakka oleccuo pokat cik akwo'rkoik thoLauion, ul woppot ia'rntintheit nili akucci ana ul wolon ilokithak wokat cik akin o'rkoik okin oleccuo ana ul iammakothok, ana ul w'rek wokat cik woppot ammakathok. <sup>16</sup> Anakka ul iangkene lon lothonce'ret lon cik woPriccin wimmarok akwo'rkoik nnul wolon ilokithak ana ul ia'rntintheit nili akucci, okin thipittathe ul iammakothok itti, “Kwontha akka akwo'rkoik okin oul wotha'rntintheit nili akucci ana ul wolon ilokithak?”

<sup>17</sup> Anakka oleccuo poccikotho elli, kwi'rekathoekin itti, “Annoka ul ioporot akkongothe itti wittiettatt anaruk ul iongo. Mpakannao anathakkaro ul ioporot mpainet ul wolon ilokithak.”

*Lon lothoco'ro nothu'rit*  
(*Maththa 9.14-17; Lukka 5.33-39*)

<sup>18</sup> Ul iammakot oluanna pomamuthie ana ul woPriccin wokat woco'rot nothu'rit. Anaruk ul w'rek wakkakathe ana wipittathe oleccuo itti, “Ngintha akka ul iammakot oluanna pomamuthie ana ul woPriccin woco'rinet nothu'rit ana ul iammakothung wakannoco'ro nan?”

<sup>19</sup> Aleccuo othiat tit itti, “Opurukon thopul ipipo thaco'ro nothu'rit taththa apul ipipo paik iakin? Okin thakannoco'ro nothu'rit akka pul ipipo paik itho'rkit

then. <sup>20</sup> Anaruk ca'ri canthan ica pul ipipo onekitta nti itho'rkit then akin antoco'ro nothu'rit.

<sup>21</sup> Pul pella pakkwo kret ikipe cit nthan ngkret ikie. Amma kwokkothe menik kret ikie ikokkuttat cit nthan killo pangken ipipe akokkat cürük cítettik. <sup>22</sup> Ana pul pella pipot thrupa ika'ruk ikipe. Amma kwipotherit ana thinya ana thillo ka'ruk ana kakittako. Kwonu itti kwipot thrupa ika'ruk ikie.”

*Oieccuo akkonu lon loca'ri caCcepith*  
(*Maththa 12.1-8; Lukka 6.1-5*)

<sup>23</sup> Ca'ri c'rek cokat cik caCcepith aIeccuo pokat cik akwokko ikkwon komil, anakka ul iammakothok wokat cik appo ikkwon okin aththut, wikkatheik acottot mil a'rko. <sup>24</sup> Ul woPriccin wi'rekathok itti, “Antokatha, ngintha akka akin okinthet lon ilonu itti lakannokkattat noca'ri caCcepith?”

<sup>25</sup> Aieccuo othianthet kin tit itti, “Onon thakan-nakkakaro lon nti atham ileret lon ila aThauth pap-pokkothe okin oul wungi akka okin thokat thongothe itti okin tha'rko thu'rit akka okin thokat thiamari? <sup>26</sup> Noma'ri mApiththar pul iprik ponoppan toKapik akka oThauth pi'rikot noppan toKapik ana kwo'rkkathe ar-rakith iothun iettathe Kapik iokat itti ul wulluk wonoppan toKapik akka'rko, ana kwekathe ul wung cakuruk ana wo'rkkathe.”

<sup>27</sup> Ittina aIeccuo i'rekat kin itti, “Ca'ri caCcepith colekkattanthet pul iponyi cik, okonnoka pul iponyi akkolekkattanthet ca'ri caCcepith cik. <sup>28</sup> Ittina ukul wopul iponyi akka Ili woca'ri caCcepith.”



## 3

*Pul ipai'rilla ukun**(Maththa 12.9-14; Lukka 6.6-11)*

<sup>1</sup> Ana ca'ri c'rek, aleccuo oingkat nocuththun ca'rama ana pul pokat cik than ponat ukun wai'rilla. <sup>2</sup> Aul w'rek woPriccin ikkat cik akin okwancot lon ilakin orukwet oIeccuo ngngin, akin ikkat cik akin occot kit naak amma akwittiethok noca'ri caCcepith. <sup>3</sup> OIeccuo pi'rekathe pul iponat ukun wai'rilla itti, "Urokothe kapik tokit koul."

<sup>4</sup> Ittina aleccuo ipittat kin itti, "Lon liatha akko-co'rotheik itti lakkattat noca'ri caCcepith, okkot lon iloporori? Ana amma okorronno okkot iloporot, okkot ilokithaki? Okkie thikkoik ciki? Ana amma okorronno okkie cik, okkwori?" Anaruk okin thangkatheik.

<sup>5</sup> Kwokathakathekin akua ka nolon lothonthoma ma then. Ana kwi'rekathe pul itti, "Othie ukun ntit." Ana pul pothiekathe ukun ana wothakkakathe woporot. <sup>6</sup> Ana ul woPriccin woingkathe thapat, ana okin thaththikkat cik akin oul woIruhuc akin eret itti okin thakkwot oIeccuo tat.

*Cungkut coul camakot oIeccuo*

<sup>7</sup> OIeccuo poingkathe nnul iammakothok norok, ana ul wonoththok poCelil woppot womakathekin. <sup>8</sup> Manakka okin thocckithe lon appik ila kwokat cik akwokkot, ul woppot wakkakanthok nci noththok poIouthia ana noka'ran koUruccelim ana noththok poIthumia, ana na acingki ummot ngngin tok'rakan korue toUruthun ana ammrththakot cik coCcur ana coCcithon. <sup>9</sup> Anakka ul wokat woppot, kwi'rekathe ul iammakothok itti, "Nona kuppuru'ng konoi'ri ikotteik akoce're ul ciththan akin okorronno onentethin cik." <sup>10</sup> Akka kwappittiethe ul woppot ionat mio kurekkurek. Ana okin ithokat thongo thokat akin errettot tokit itti akin othontok. <sup>11</sup> Ana na

u'rupa iokithak wimmathok, wapukkot tokit kung ai're mpo're cittan itti, “Oung ukul woKapik.” <sup>12</sup> Anaruk kwekathekin lon lonthoththomat itti okin thakanni're itti, ook okkwen.

*Thipot ul cik wothothilettat iattul ana ikken ke'ra  
(Maththa 10.1-4; Lukka 6.12-16)*

<sup>13</sup> Oieccuo poingkathe iccik koco'rong ana kwakkarathe ul ia kwongothe, ana okin thakkakanthok. <sup>14</sup> Ana kwipathe ul cik wothothilettat wung iattul ana ikken ke'ra, othakka itti akin oka okin aththut ana othakka itti akwothilet kin akin othongkene ul <sup>15</sup> ana ona pu'ran ipakin okicce u'rupa iokithak ngngin. <sup>16</sup> Okin enthi ithattul ana ikken ke'ra, itha kwapponekkethe cik, oCcaimon (ipa kwocciyet k'ran itti oPoththuruc) <sup>17</sup> ana oIakup ukul woCepethi ana opang oIuanna (okin then itha kwappocciyet 'ran itti Panoroco ilonu itti 'nyukul nyothule'rak'), <sup>18</sup> ana Anthrauc ana oPilippic ana oPerththolomauc ana oMaththa ana oThthoma ana oIakup ukul wAlappaoc ana oThthothaoc ana oCcaiman ipokat pongothe lon lopotok pung, <sup>19</sup> ana oIoutha Icikkariuththi, ipokerot oieccuo.

*Oieccuo ana oPelecepul  
(Maththa 12.22-32; Lukka 11.14-23; 12.10)*

<sup>20</sup> Ittina oieccuo pi'rikathe noppa, ana ul wappra'rn-takat, ana ook ana ul iammakothok thommakathe o'rkoik akka okin thokat thi'rikothe. <sup>21</sup> Anakka ku'ri kung koc-cikothe lon ilokat cik okin thoingkathe akin othipok ntan akka okin thi'ret itti, “Kwonu purrut.”

<sup>22</sup> Ana ul iangkene lon lothonce'ret lon cik iaat nnoka'ran koUruccelim wi'rekathe itti, “Kwonu pu'ran poili wou'rupa iokithak oPelecepul ana kwaik pakicce u'rupa iokithak mpu'ran pen.”

<sup>23</sup> Ittina oIeccuo pakkarathekin ana kwi'rekathekin nthokkwie lon kuru ncik itti, “Pul pothopulut pakicce pul pothopulut taththa? <sup>24</sup> Amma ngili ngillillakot tit kurekkurek, ngili ngen ngakanno'rungkot cik. <sup>25</sup> Amma ul woruan willillakot tit okin thakannikkoik tothun. <sup>26</sup> Ana amma pul pothopulut poprttakothe ika kung ana pakan-nappo'rungkot cik. Ittina pu'ran pung paik pintat cik. <sup>27</sup> Laik icat itti pul pella pi'riko noppa topul iponthomat mpu'ran akwoneko a'rupu wung, kwonu itti kwi'rikikko pul pen cittokit akwantoneko a'rupu. <sup>28</sup> Mpi'ret non lon ilaik icat itti lon ilokithak appik ana thocungkoik thoul thaccikakinthet kin. <sup>29</sup> Anaruk pul ipacungko Kanang ikupupure kwakannoccikakinthet lon ilokithak lung thupuththuput.” <sup>30</sup> Kwi'ret elli akka okin thi'rethok itti, “Kwonu u'rupa iokithak.”

*Onnan poleccuo ana opangon*  
(*Maththa 12.46-50; Lukka 8.19-21*)

<sup>31</sup> Onnan poleccuo ana opangon thakkakathe ana okin thoco'rathe thapat akin othiat pul p'rek itti pathakkarok. <sup>32</sup> Ana ul wokat cik woppot ammrththakothok, ana okin thomekathok itti, “Onne ana opangkangon thaik thapat thakwariccathung.”

<sup>33</sup> Akwipittat kin itti, “Oththa ongaia ana opangkingon?”

<sup>34</sup> Ana kwokathakathe ul iokat cik ammrththakothok ana kwi'rekathet itti, “Ongaian enthi ana opangkingon enthi. <sup>35</sup> Okkwi ipakkot ngre ngoKapik ook opangkin ipocura ana ipopari ana ongaia pin.”

4

*Thokkwie lon kuru ncik thopul ipee*  
(*Maththa 13.1-9; Lukka 8.4-8*)

<sup>1</sup> Ana oIeccuo pikkatheik cakuruk akwongkene ul icik korok. Ana cungkut coul woppot ca'rantakathe ammrththakathok, akwarrat ikuppu'rung konoi'ri akwikkat cik tit ana ul appik wokat cik nokuthut korok. <sup>2</sup> Kwongkenekathekin lon loppot nthokkwie lon kuru ncik ana kwikkatheik akwongkenekin itti, <sup>3</sup> “Nantocçikot, pul pokkwon peot itti pathee mil. <sup>4</sup> Anakka pokat apee mil, am'rek apukkat ikathar, au'rupe akkakat acumat ncik appik. <sup>5</sup> Am'rek apukkat nok'rimi ikonat nünthü notte. Ana mummathe cokocokot akka mokat no'rupu. <sup>6</sup> Anaruk akka cingki cuat, au'ruccu womil ok'rat ana wonthomakathe akka mellat laka ippu. <sup>7</sup> Amil m'rek apukkat itho'rkit tholi amocokkakat ali okarthat ana makannokwonat. <sup>8</sup> Anaruk am'rek mapukkathe nocapu icoporot. Mummathe amocokkakat ana mokwonathe mil mipiet kicce, am'rek ipiekat kit ken arrial ana alkaire (30), ana am'rek arrial w'rakkuruk (60) ana am'rek arrial ukuluk (100).”

<sup>9</sup> Aieccuo i'rekat itti, “Okkwi iponu unu itti kwaccikot, akwocçikot.”

*Lon ila oIeccuo perenet nthokkwet lon kuru ncik  
(Maththa 13.10-17; Lukka 8.9-10)*

<sup>10</sup> Anakka kwokat cik prek, ul wung wothothiletat iattul ana ikken ke'ra ana opilingon ithokat ammrththakathok ipittathok lon lothokkwie lon kuru ncik. <sup>11</sup> Akwomekat kin itti, “Kumitta kongili ngoKapik kokenettat non anaruk p'rak iparon thakannoka uraththungon, pi'rettat lon appik nthokkwie lon kuru ncik. <sup>12</sup> Othakka itti,  
'Okin thantokathacce lon ngkit anaruk okin thakannina,  
ana okin thaccikot lon ana okin thamma,  
akka amma okin thocçikotho ana okin thaprttakoik nti  
ilon ilokithak

ana okin thaccikakinthet lon ilokithak.”

*Oieccuo pakene lon lothokkwie lon kuru thopul ipee  
(Maththa 13.18-23; Lukka 8.11-15)*

<sup>13</sup> Ittina aieccuo i'rekathekin itti, “Onon thomma lon lothokkwie lon kuru ncik elli? Ana onon thantinakat lon lothokkwie lon kuru ncik l'rek ilaik tat? <sup>14</sup> Pul ipee, ook pul ipaik pangkene lon loKapik. <sup>15</sup> Ul w'rek waik ammakka mil imothithiekotheik ikathar. Amma okin thoccikothe lon, pul pothopulut panthan accokkot aponekat kin lon ilakin thoccikothe nnomikit men. <sup>16</sup> Opilingon thammakka mil imapukkothe nok'rimi, okin thaccikot lon akin opirakat noka. <sup>17</sup> Anaruk akka lon lakannocokot cik nomikit, lon len lakinnikkoik puccuk. Ana amma thokkiettat thiak thaat nti ilon len okin thapa'rineik accokkot. <sup>18</sup> Ana opilingon, thammakka mil imapukkothe itho'rkit tholi, okin thaccikot lon, <sup>19</sup> anaruk thirro mikit nti ikarak nolon lothikkoik enthi ana thammikkarakat thothe'rthan ana thongat tha'rupu w'rek thi'riko nomikit cakuruk athokittat lon loKapik. <sup>20</sup> Ana ul w'rek wammakka mil imerat nocik icoporot, okin thaccikot lon akin angkat, akin okkwoniekat mil arrial ana alkaire ana a'rek arrial w'rapuruk ana a'rek arrial ukuluk nomil imokat mettat.”

*Thonekket thik cik no'ret  
(Lukka 8.16-18)*

<sup>21</sup> Ana kwi'rekathekin itti, “Onon thaccie thik anappoku'rupot cerok nani ana manna onekket thoceken copap'reki? Onon thakorronno onekket cik no'ret athoccieiki? <sup>22</sup> Akka lon ilamu'ruttakat ncik linako nan ana ilocukkwakat nan littako ncik. <sup>23</sup> Okkwi iponu unu itti kwaccikot cik akwoccikot.”

<sup>24</sup> Ana kwi'rekathekin cakuruk itti, “Nokkwine lon kunu ncik kicce ilanon thaik thaccikot, akka lon ilanon okkot lakkattanthet non ana manna arttakot nan.

<sup>25</sup> Okkwi ipakkwine thongkene thin kunu ncik, kwina arttot nan, ana okkwi ipakorronno occikot lon lin, antoka manna itti kwina kwanekittat thina then.”

*Thokkwie lon kuru ncik locore icummot*

<sup>26</sup> Ana kwi'rekathekin cakuruk itti, “Ngili ngoKapik ngammakka lon elli. Pul peet mil. <sup>27</sup> Ngko'ra ana icingki core cocil caik cacokka antoka manna itti kwomma itti caik cacokka tat. <sup>28</sup> Lon len lakkattat pellek, capu cummiet t're cittokit aroingkat ikwonco arokkat tartta, arokkat cil. <sup>29</sup> Ana amma mil mo'riat ana thuput thaathothokio, kwaneko ki'rittang akwothokiat.”

*Thokkwie lon kuru ncik thocore icoththe  
(Maththa 13.31-32; Lukka 13.18-19)*

<sup>30</sup> Kwappi'rekat cakuruk itti, “Ngintha akka oron unkwie ngngili ngoKapik ngngin, ana manna thokkwie lon kuru ncik thiatha itharon eret ngngin? <sup>31</sup> Ngili ngoKapik ngungkot core icoththe kannan iceera inocapu. <sup>32</sup> Anaruk amma ceerat cacokka acothakkakat pira pittik ipangken, apokkat u'ri wittittik au'rupe ikkat cik irnek ten.”

<sup>33</sup> Oieccuo pokat cik akwerenekin nthokkwienekin lon kuru ncik loppot ammakka elli ilokat aliniekin lon. <sup>34</sup> Kwakannerenekin lon l'rek aththik okorronno okkwienekin lon kuru ncik anaruk amma okin thaik threk okin oul iammakothok akwerenekin lon kicce okorronno okkwienekin lon kuru ncik.

*Oieccuo papiet kanang cik ikao ngkapik  
(Maththa 8.23-27; Lukka 8.22-25)*

<sup>35</sup> Ana ca'ri cen cipin akwi'rekat ul iammakothok itti, “Ntun arrot nocarkan corok c'rek.” <sup>36</sup> Akin oththekat nongkut coul akin arriekathok ikuppu'rung konoi'ri ana ul w'rek womakathok nuppu'rung wonoi'ri w'rek cakuruk. <sup>37</sup> Ana kanang kakkakathe akikkat cik akokkurarot kannan, athopangka thoi'ri ongu'rot ciki ithi'rot ai'ri

ikkat cik angothukkwot ikuppu'rung akikkat cik ere kuo tho'ronthong. <sup>38</sup> Ana oIeccuo pappokat cik akwicat thoccken cokuppu'rung akweot inthe, ana ul iammakothok wurttathok ai'rekathok itti, “Pul ipangkene, ngkwella thiak thïn akka onïn thaik thïkïkko ng'ri?”

<sup>39</sup> Akurokat kapik akwothirriekat kanang cik akwi'rekat thopangka thoi'ri itti, “Angkik ana itti oco'ri.” Ana kanang kangkatheik accokkot ana cik cökwathe ka appik.

<sup>40</sup> Ana kwi'rekathe ul iammakothok itti, “Onon thontha akka annopelle? Onon tharthuk thella thocokot lon loKapik nomikïri?”

<sup>41</sup> Ana okin thipathe n're akin okkwe ka akin ikkat cik akin ipittarot itti, “Oththa empi? Akka manna kanang ana thopangka thoi'ri thaccïkothok.”

## 5

### *Oieccuo pittiet pul iponu u'rupa iokithak*

*(Maththa 8.28-34; Lukka 8.26-39)*

<sup>1</sup> Okin tharrathe tok cik akin eo nocik coCcethirin. <sup>2</sup> Anakka oIeccuo porpotheik nti ikuppu'rung konoi'ri, apul p'rek akkakat nonupu ponat u'rupa iokithak noka apathocurot iaak. <sup>3</sup> Pul pen pikikkot cik nonupu ana manna pul pellat ipi'rikikkok nynyol. <sup>4</sup> Okin thokat akin i'rikikkok appinappin nyaun ana tacok anaruk kwokat cik akwommotho nyol nnonyaun ana nnoracok. Pul pellat iponthomat kannan othakka itti apalkothok. <sup>5</sup> Kwokat cik akwaalle nonupu ana imu'rol icïngki ana ingko'ra ana kwokat cik akwokontotto kuri ana akwokecce ka kung mmothok.

<sup>6</sup> Anakka kwimmat oIeccuo nciththan akwollat taak akwekat ungu ncik tokit kung. <sup>7</sup> Kwi'rekathe mpo're cittan itti, “Ngintha akka ngkwimmathe naun, Ieccuo,

ukul woKapik korothi'rot, arrma ngk'ran koKapik itti ngkwakannokkiethin thiak.” <sup>8</sup> Akka oIeccuo pappi'rethe u'rupa iokithak itti, “U'rupa iokithak, oppothe thapat nti ipul empi.”

<sup>9</sup> Menik aIeccuo ipittathok itti, “Ngkwocot k'ran itti oththa?”

Akwothianthok tit itti, “Mpocot k'ran itti ‘cungkut’ akka onin thoppot.” <sup>10</sup> Ana kwipittathe oIeccuo attang ana attang itti kwakannothiot kin thapat nocik ence're.

<sup>11</sup> Ana iccik koko'rong cınang, cungkut conuththuruk cokat cik acu'ro. <sup>12</sup> Ana u'rupa iokithak wipittathe oIeccuo itti, “Othiothenin inuththuruk, akorronno anin i'rikikkorit.” <sup>13</sup> Kwokorronnathē u'rupa iokithak ana woppathe thapat nti ipul ana wi'rikikkathe inuththuruk. Ana nuththuruk athar we'ra (2,000) noccorathe uo nokuthut korok ana napukkathe irok ana n'ikikkathe ng'ri.

<sup>14</sup> P'rak ipu're nuththuruk pollathe ana paththi'rekat ul lon len icarak coman ana iaik nomipit, ana wakkakathe itti wathokatha lon len. <sup>15</sup> Manakka okin thainet oIeccuo, okin thaththiat pul iponat u'rupa iokithak noka apikkoik appakot eret ana pothakkat poporot ca, ana okin thipathe n're. <sup>16</sup> P'rak ipokat pimmat, pi'rekathē ul lon ilokkattathe nopul iponat u'rupa iokithak. Ana okin therekanthet kin lon lonuththuruk cakuruk. <sup>17</sup> Ittina ul wi'rekathē oIeccuo itti kwaththe nocik cen.

<sup>18</sup> Anakka oIeccuo pokat cik akwarrot ikuppu'rung konoi'ri, pul ipapponat u'rupa iokithak pipittathok itti pamakothok. <sup>19</sup> OIeccuo p'rakanthok anaruk kwi'rekathē itti, “Ngko tuan thanang athi'ret ku'ri kang lon appik ila Ili wokkinthung, ana tat akka wipot thiak thang.” <sup>20</sup> Ittina pul poingkathe ana pikkatheik aperene ul Na'ran iattul lon loppot ila oIeccuo pokkinthok. Ana ul appik woprttakathē tit.



*Ukul iopari iiot ana pul ipopari ipongo  
(Maththa 9.18-26; Lukka 8.40-56)*

<sup>21</sup> Anakka oieccuo parrothe tok cik irapangka attang akweo nocarkan corok c'rek ngkuppurung konoi'ri, ul woppot wa'rntakathe iccik kung iccik korok. <sup>22</sup> Opilin nti inili nonocuththun ca'rama poccot k'ran itti olairoc akkakat nocik cen. Manakka kwimmat oieccuo, akwapat iracok tung. <sup>23</sup> Kwipittathok nthiak akwi'rekathok itti, "Ukul win iotteik iopari waik wio, ana ngkwanthan athonekhet nyaun nan othakka itti akkoik." <sup>24</sup> Ittina oieccuo poingkathe akin atththe'ra.

Ana cungkut coul woppot comakathok ana cikkatheik acontentekot cik iccik kung. <sup>25</sup> Ana pul ipopari pokat nocik cen ponat luput attul ana ikken ke'ra (12), aüccük ollo nti iaak. <sup>26</sup> Kworttekot thiak kannan akwoincene ul ittiet ul itti akwothakka poporot ana kwokittathe akucci cik ia kwonat appik itti akwothakka poporot anaruk kwothakkathe pongo kannan. <sup>27</sup> Manakka poccikothel lon loieccuo, pakkathe nthoccul koieccuo itho'rküt thoul apothntat thon thokret koieccuo, <sup>28</sup> akka kwerethe nociküt cung itti, "Amma mpothntot kret kung ana mpittat." <sup>29</sup> Ngüccük ngoco'rathe nti iaak accokkot ana kwinakathe noka kung itti kwothakkat poporot ngüccük ngoco'rot.

<sup>30</sup> Oieccuo pinakathe nan itti pu'ran peot nti iaak ana kwolliakathe ul ana kwipittathekin itti, "Oththa akkothntot kret kin?"

<sup>31</sup> Ul iammakothok wi'rekathok itti, "Ngkwimmat itti ul woppot waik wanentethung cik, ana tat akka aipitto itti, 'Oththa akkothntorin?'"

<sup>32</sup> Anaruk oieccuo pikkatheik akwolliakot cik othakka itti akwimma pul ipothntot kret. <sup>33</sup> Pul ipopari pen pinat itti pittathe papathe iracok toieccuo apokkwe ka n're ana pi'rekathel oieccuo lon appik ilaik icat. <sup>34</sup> Aieccuo

i'rekathok itti, “Ukul win, thocokot tholon loKapik nocikit thang thittiethung. Ngko amio opa'rik naung.”

<sup>35</sup> Manakka oIeccuo pokat cik akwere, ul w'rek wakkakathe ntuan toIairoc, ili wonocuththun ca'rama ana wi'rekathe itti, “Ukul wang wiot. Ana ngkwakinyie pul ipangkene pothen?”

<sup>36</sup> Aleccuo okorronno okkwanthet lon ilakin thi'ret kunu ncik akwi'rekat ili wonocuththun ca'rama itti, “Kir-rni opelle occokothe lon loKapik nocikit.”

<sup>37</sup> Ana kwakannokarrnat itti pul p'rek pamakothok, oPoththuruc pulluk ana oIakup ana oIuanna opang poIakup. <sup>38</sup> Manakka okin theot tuan toili wonocuththun ca'rama, oIeccuo pimmakathe cungkut coul iokat cik aoo mpo're cittan. <sup>39</sup> Kwi'rikathe noppa ana kwi'rekathekin itti, “Nthontha akka annoo ana annothukkwo ka ncik? Ukul wakinnio anaruk waik inthe.” <sup>40</sup> Anaruk okin thoc-cirathok ngngin.

Anakka kwothiothekin thapat appik, kwipathe oth-than pokkul ana onnan ana ul iammakothok iakin thokat aththut, ana okin thi'rikathe na ukul wokathok cik. <sup>41</sup> Kwonthathe ukul ncik ana kwi'rekathok ngkarru kung itti, “Thaliththa koum,” ilonu itti, “Ukul ioththeik, mpi'rethung itti urokothe kapik.” <sup>42</sup> Ana ukul wurokatho accokkot ana wikkatheik anyaro. Ukul waronat luput attul ana ikken ke'ra. Okin thikkatheik akin oprttakat tit nn're. <sup>43</sup> Ana oIeccuo pi'rekathekin lon lonthoththomat itti okin thakinni'ret pul p'rek lon elli ana kwi'rekathekin itti okin thethet ukul a'rupu w'rek a'rko.

## 6

*Oieccuo pakorronno othiakineik noththok pung  
(Maththa 13.53-58; Lukka 4.16-30)*

<sup>1</sup> Oieccuo poththekathe nocik cen ana kwoingkathe noka'ran kung ikokat ka'ran koNaccir, ana ul

iammakothok woingkathe okin aththut. <sup>2</sup> Anakka ca'ri caCcepith caat, kwikkatheik akwongkenekin nocuththun ca'rama ana okin ithoccikothe lon lung thikkatheik akin oprttakot tit.

Ana okin thipittarathe itti, “Pul empi piothe lon elli kartha? Thinaik nti ica thiatha enthi ithettathok akka manna kwaik pakkot lon ilommaththik. <sup>3</sup> Okorronno oka ook pul ipaccatha o'reni? Okorronno oka ukul woMeriomi ana opang oIakup ana oIuccip ana oIouthai ana oCcamaani? Okorronno oka opangan ithari itharon thaik cenei?” Ana okin th'rakathe lon lung.

<sup>4</sup> OIeccuo pi'rekathekin itti, “Pul pothernte lon loKapik pothiakinet cik na'ran appik anaruk kwakannothiakineik noka'ran kung ana noku'ri kung ana noul woruan thanung.” <sup>5</sup> Kwommat okkot lon ilommaththik ceneket, anaruk kwonekkethe nyaun noul wotteik iongo ana kwothikkiekathekin thoporot. <sup>6</sup> Ana kwokat cik akwoprtakot tit akka okin thellat thoccokot lon loKapik nomikit.

*OIeccuo pathiot ul wung iattul ana ikken ke'ra  
(Maththa 10.5-15; Lukka 9.1-6)*

Ittina oIeccuo poingkathe akwonyaro na'ran akwongkene. <sup>7</sup> Kwakkarathe okin ithattul ana ikken ke'ra (12) akwothilekat kin the'ra the'ra na'ran kurekkurek ana kwekathekin ngili akin okicce u'rupa iokithak. <sup>8</sup> Ana kwi'rekathekin lon lonthoththomat itti, “Nokorronno oneko alp'rek aththik nokurtti kon, noneko kurrong kulluk. Nokorronno oneko thu'rit ngka'ruk nokurtti ana akucci ia'ruk. <sup>9</sup> Nako wok annokorronno oneko eret arttot nan.” <sup>10</sup> Ana kwi'rekathekin cakuruk itti, “Amma onon thi'rikot tuan topul, nikkoik noppa ten puccuk annoththekat noka'ran ken. <sup>11</sup> Ana amma ul wonoka'ran ken wakinnikkienon cik ana okorronno occikot lon, annokkwe tu'rupang noracok ton amma annoththe

noka'ran ken, aloka lon ilimmat lon ngkit itti okin th'rat lon lon.”

<sup>12</sup> Okin thoingkathe akin ongekene ul itti wapa'rine lon ilokithak cik. <sup>13</sup> Ana okin thokiccekathe u'rupa iokithak woppot nnoul ana o'ro ul ngaak iupupure woppot ana okin thothikkiekathekin thoporot.

*Thio thoIuanna pomamuthie  
(Maththa 14.1-12; Lukka 9.7-9)*

<sup>14</sup> Aili oIruthuc occikat lon len, akka k'ran koleccuo kokat kinakot ncik appik. Opilingon thokat cik akin ere itti, “OIuanna pomamuthie purokot nti ithio, ana ilen akka pu'ran polon ilommaththik paik parekine iaak.”

<sup>15</sup> Ana opilingon i're itti, “Ook oillia.”

Ana opilingon i're itti, “Ook pul pothernte lon loKapik ammakka pul p'rek nti iul wothernte lon loKapik woma'rot wothupuththuput.”

<sup>16</sup> Anaruk akka Ili oIruthuc poccikothe lon elli, kwi'rekathe itti, “OIuanna pomamuthie ipa mpokiothe ca akkurokot nti ithio.”

<sup>17</sup> Akka oIruthuc ngka kung akki'ret itti oIuanna pac-cokittat akwi'rikikkako, ana oIuanna poccokittakathe ana kwonekkettakathe ikorrkkor. Kwokkothe elli nti ilon loIruthia pari popang oPilippic ipa kwappipothok. <sup>18</sup> Akka oIuanna pokat akwerene oIruthuc itti, “Lon elli lakannoka loco'rotheik itti ngkwipo pari popangkang.” <sup>19</sup> OIruthia puakathe ka koluanna itti kwakkwothok anaruk kwomat itti kwakkwothok tat <sup>20</sup> akka oIruthuc ponat n're noIuanna akwa'rettanthok akka kwinarok itti kwokat pul ipoporot pupupure. Anakka oIruthuc poccikothe akka oIuanna ere, alon ocikittanthok ca anaruk kwokat pongothe itti kwaccikot lon lung.

<sup>21</sup> OIruthia piathe ca'ri ica kwokat cik akwokwancot. Nokamuthe koca'ri cothokwonta thoIruthuc, oIruthuc

pakkarathe ul ittittik ana nili noul irro ana ul ionu lon ikkun wonoththok poCelil. <sup>22</sup> Ana ukul iopari woIruthia wukkwathe ana wopiriekathe oIruthuc noka ana ul wung iakin thokat cik akin o'rko thu'rit.

Alli oIruthuc i'rekat ukul iopari itti, "Ipittothin papu ipa ngkwongothe ana mpethung." <sup>23</sup> Ana kwonekkekanthet ukul lon cik akwi'rekat itti, "Papu ipa ngkwipittothin mpethung, antoka manna ngili ngin app'rut."

<sup>24</sup> Ukul woppathe thapat ana wi'rekathie onnan itti, "Ngintha akka anipitto?"

Annan i'rekathok itti, "Ipitti ca coluanna pomamuthie."

<sup>25</sup> Ukul woingkanthet Ili oIruthuc ana wipittathok itti, "Mpongothe itti ngkwethin ca coluanna pomamuthie nocaththak inaina."

<sup>26</sup> Ili wappakannapira noka kannan, anaruk akka kwaponekkethe lon cik, ana ul wung woccikothe ana ilen akka kwakannangkot itti kw'rane lon lokkul. <sup>27</sup> Nci cinang kwothiathe pul pothorro llon lonthoththomat itti kwathokiot ca coluanna. Pul pothorro poingkathe ana pokiathe oIuanna ca cik ikorrkkor. <sup>28</sup> Ana ponakathe ca coluanna nocaththak. Ana kwekathe ukul ana wekathe onnan. <sup>29</sup> Anakka lon len loccikakothe, ul woluanna iammakothok wakkakathe ana wonekathe kumi ana wathhocikkat.

*Oieccuo pa'rikié ul athar ukuluk*

*(Maththa 14.13–21; Lukka 9.10–17; Iuanna 6.1–14)*

<sup>30</sup> Ana ul wothothilettat wa'rntakathe iccik koIeccuo ana okin therekanthok lon appik ilakin thokkothe ana ilakin thongkenet. <sup>31</sup> Anakka ul wokat cik aeo ana anthan, okin thommakathe itti okin tha'rko thu'rit tat. Akwi'rekat kin itti, "Ntun thellek thomnther annothongoko papotteik."

<sup>32</sup> Ittina okin tharrathe kuppuru'ng konoi'ri ana okin thoi'ngkathe cinoka'ran thellek na ul wellat. <sup>33</sup> Anaruk ul woppot wimmakathekin akka akin eo ana wakkakathe nna'ran appik allat tokit ken aingkat noka'ran tokit koleccuo ana ul wung iammakothok awarthuk ao. <sup>34</sup> Manakka oleccuo porpotheik nocapu nti ikuppuru'ng konoi'ri, akwimmakat cungkut coul woppot, akwipat thiak then akka okin thokat ere lungkat ilella opit nan. Ittina kwikkatheik akwongkenekin lon loppot.

<sup>35</sup> Noca'ri cen cipin cokat capot ana ul iammakothok wakkakanthok, ana wi'rekathok itti, "Ka'ran engki kella ulrit ana cik ceot. <sup>36</sup> Omethe ul apettakot cik othakka itti akin eo na'ran iccik konnon akin othokerine ka ken alp'rek akin o'rko."

<sup>37</sup> Anaruk kwothi'atherit itti, "Nethet kin alp'rek akin o'rko."

Okin thi'rekathok itti, "Elli lonu itti pul pareko anak mormor apantokero arrakith iekko noul enni appik."

<sup>38</sup> Aleccuo ipittat kin itti, "Ngkonon anothokatha, onon thonu arrakith wornoththa?"

Anakka okin thiothe akin i'rekat itti, "Arrakith ukuluk ana ape we'ra."

<sup>39</sup> Aleccuo omekat kin itti okin thikkie ul cik appik mungkut mungkut noraco iricci. <sup>40</sup> Okin thikkiekathe ul cik nocapu mungkut, me'ra culukku arrial ukuluk ana ac'rek arrial we'ra ana alkaire. <sup>41</sup> Ana oleccuo ponekathe arrakith ukuluk ana ape we'ra akwokathakat tothi'rot ana kwopiriekathe Kapik ana kwomithathe iarrakith ana kwekathe ul iammakothok akin ikket ul. Ana cakuruk kwummathe ape we'ra ana kwillillanthet kin tit appik.

<sup>42</sup> Ana okin tho'rkkathe appik ana okin thoththakakathe.

<sup>43</sup> Ana ul iammakothok wocumathe arrakith ana ape

iokwentakot nan nyalünthüing attul ana ikken ke'ra op-pappat. <sup>44</sup> Ana maun mouli iomura iokat wo'rkot cik wokat athar ukuluk (5,000).

*Oieccuo panyaro no'ra worue irapangka  
(Maththa 14.22-33; Iuanna 6.15-21)*

<sup>45</sup> Aleccuo i'rekat ul wung iammakothok accokkot itti warrot ikuppu'rung konoi'ri akin eo tokit kung eo Peththceitha akwi'rikot opettot ul cik, nci cĭnang kwothiathe ul ikathar. <sup>46</sup> Anakka kwopettothe ul cik akwoingkat iccik koco'rong akwotha'ra nga'rama.

<sup>47</sup> Anakka cipin capot, kuppu'rung konoi'ri kokat cik ipanan porok irapangka ana kwokat cik nocarkan corok prek. <sup>48</sup> Oieccuo pimmakathe ul iammakothok akuppu'rung konoi'ri attakin akka kanang kokat akaukkukkot kin. Ana cik cokat thothuput thorrot, oieccuo pakkakathe nakin akwonyaro no'ra woi'ri. Ana kwokat cik ere kwaik parrot kin cik, <sup>49</sup> anaruk akka okin thimmarok akwonyaro no'ra woi'ri, akin i'rekat nomikit men itti, "Ook purrut." Akin ikkat cik akin oo, <sup>50</sup> akka okin appik thimmarok okin thipathe n're.

Kwi'rekathekin accokkot itti, "Nopo'rathan, oun ana thakorronno opelle." <sup>51</sup> Ana kwarrathe ikuppu'rung konoi'ri akin aththungon, ana kanang kokapik koco'rathe ana okin thoprattakatherit kannan. <sup>52</sup> Akka okin thokat thakininna lon ilommaththik ila oieccuo pokkothe akka kwo'rikiet ul woppot arrakith wotte ana ape akka mikit men mokat munukkwakotho.

*Oieccuo pittiet pul ipongo nocik coCenecciriath  
(Maththa 14.34-36)*

<sup>53</sup> Manakka okin tharrotheik, akin orpat cik nocik coCeniccarth, akin i'rikat kuppu'rung konoi'ri nan <sup>54</sup> Manakka okin thorpot nti ikuppu'rung kono'ri ul

winakathe oIeccuo. <sup>55</sup> Ana okin thopellekathe ntan oppo na'ran enn're appik akin onnekinok ul iongo na'rangkal na akin thocçikothe itti kwaik. <sup>56</sup> Ana na'ran appik na kweot nomo'rong, akin ipot ul iongo keccuk. Akin ipit-tothok itti kwakorronno ul iongo athonto manna to'ron lokret kung. Ana okin appik ithothntot thittakathe.

## 7

*Occikot lon loKapik*  
(*Maththa 15.1-23*)

<sup>1</sup> Ul woPriccin ana ul w'rek woul iangkene lon lothonce'ret lon cik iaat noka'ran koUruccelim a'rntakat iccik koIeccuo <sup>2</sup> akin immakat ul iammakothok w'rek a'rko thu'rit akin thakinnilakko nyaun ammakka thathuma thoul woIouth. <sup>3</sup> (Ul woPriccin ana ul woIouth appik wakanno'rkoik amma okin thakinnilakko nyaun ammakka thathuma thoul wen ittittik. Okin thimmakathe ul wung w'rek a'rko thu'rit nyaun nyonyi <sup>4</sup> Amma okin thaat ngkeccuk okin thakanno'rkoik amma okin thakinnilakko. Ana okin thangwot thathuma th'rek ammakka itti ome maththak mothu'rit.)

<sup>5</sup> Aul woPriccin ana ul iangkene lon lothonce'ret lon cik ipittat oIeccuo itti, “Ul iammakothung wontha akka akan-noccot kit nothathuma thothiki akka okin thaik tha'rko thu'rit akin thakinnilakko?”

<sup>6</sup> Akwothiat tit itti, “Lon loIccaia pul pothernte lon loKapik lokat icat akka perethenon ithinnikot lon ammakka lokurrakot iatham wung itti,

‘Ul enni wathianin cik llon nuthuk,  
anaruk mikit men maik ciththan naun.

<sup>7</sup> Okin tha'ranin nga'rama ella mikit nan,  
okin thangkene thongkene thoul ionyi.’



<sup>8</sup> Onon thopa'rinet lon loKapik cik ana onon tho'rumot nothathuma thothiki.”

<sup>9</sup> Ana kwi'rekathekin itti, “Onon thina akka annopa'rine lon loKapik cik othakka itti annocot kit nothathuma thon. <sup>10</sup> OMucca pi'ret itti, ‘Othianet oththe cik ana onne’ ana ‘Okkwi ipattatta oththan ana onnan kwonu itti kwakkuttat.’ <sup>11</sup> Anaruk onon thangkene itti amma pul ponu pap'rek itti kwittarot oththan ngngin ana manna onnan kwi'ret kin itti, ‘A'rupu enni ampongothe itti mpittarot non ngngin anaruk wothehet Kapik nuthuk,’ <sup>12</sup> Lakene itti onon thakannangkot itti kwittarot oththan ana onnan. <sup>13</sup> Menik onon thaik th'ra lon loKapik amma annocokot thathuma thon. Ana onon thaik thakkot lon loppot ammakka elli.”

<sup>14</sup> Aleccuo akkarat cungkut coul akwi'rekat kin itti, “Nantocckothin appik, nantocckot lon lin anninakat lon len. <sup>15</sup> A'rupu ia pul othurukkwet icarak wakannothikkiek pokithak anaruk lon ila pul ere, ilen akkathikkiek pokithak. <sup>16</sup> [Amma okkwi iponu unu itti kwaccikot, akwocckot.”]

<sup>17</sup> Manakka kwoththet nocungkut coul, kwi'rikathe noppa, aul iammakothok ipittathok lon lothokkwie lon kuru ncik. <sup>18</sup> Aleccuo ipittat kin itti, “Onon tharthuk thomma lon ila mpaik pereri? Onon tharthuk ina itti a'rupu wella iuo icarak copul wathikkiek pokithaki? <sup>19</sup> Akka wakanneo nocikit anaruk waeo icarak ana nti icarak wakinyakot cik.” (Akka oleccuo pi'ret ittina akkwaik akwi're itti, “Thu'rit appik thoporot.”)

<sup>20</sup> Kwikkatheik akwere itti, “Lon ila pul i're ana okkot ilen akkathikkiek pokithak. <sup>21</sup> Akka lon ilokithak ammakka itti, thokwarttikot cik ithokithak ana tha'ro nul nuthuk ana thu'ran ana thokkwot pul ana tha'ro nul iari

---

7:10 7.10 Thoppot thapat 20.12; Thethinia 5.16    7:10 7.10 Thoppot thapat 21.17; Lauin 20.9

ittat <sup>22</sup> ana thrik nan ana thonyira ana karra ana thocungkoik ana thona cikit cokithak ana thipot ka thoura ana thommaik thokorronno pul apoka pokithak. Akka lon elli appik lanthan nocikit copul. <sup>23</sup> Lon elli appik ilokithak lanthan nti icarak alothikkiekat pul pokithak.”

*Thocokot lon loKapik nocikit thopul ipopari poul woPinicia*

*(Maththa 15.21-28)*

<sup>24</sup> Oieccuo poththekathe nocik cen ana kwoingkathe nocik coCcur. Kwi'rikathe noppa ana kwokat pakanangkot itti pul p'rek pina na kwaik, anaruk ul winakathe na kwokat. <sup>25</sup> Anakka pul ipopari iponat ukul iotteik ipopari ia u'rupa iokithak wo'rot nan pocikithe lon lung pakkakanthok ana papathe iracok tung. <sup>26</sup> Pul ipopari iponat thiki noul woKrik ana pokwontathe nocik coPinicia noththok poCcuria pipittothe oieccuo itti kwakic-cenok u'rupa iokithak nnokkul wung.

<sup>27</sup> Aleccuo i'rekathok nthokkwie lon kuru ncik itti, “Kir-rnni anyukul o'rko thu'rit appik itha anyongotho tokit akka lakannoka loporot itti thu'rit thanekittat nyukul athettat luk.”

<sup>28</sup> Apul ipopari othiat tit itti, “Icat Ili win, anaruk luk ilaik thoceken cokuppu'rung manna la'rko thu'rit ithapukkot nyukul.”

<sup>29</sup> Akwi'rekathok itti, “Nti ilon lang elli ngko, u'rupa iokithak woththet nokkul wang.”

<sup>30</sup> Apul ipopari oingkat tuan ana paththiat ukul aicat cik na'rangkal au'rupa iokithak wopa'rot cik nti iak.

*Thanyinthet pul ipauril unu*

<sup>31</sup> Ittina aleccuo oththekat nocik coCcur akwoingkat okko noka'ran koCcithon uo nca norok irapangka toCelil ana okkette Na'ran iattul. <sup>32</sup> Ul w'rek wonokanathok

pul ipauril ana pomma ere ana okin thipittathok itti kwanekket ukun wung nopul.

<sup>33</sup> Akwonekathok thocipit nti itho'rküt thocungkut coul, aieccuo onekkekat maun thounu akwopathok nguk ana othntok thu're. <sup>34</sup> Akwonthat kit tothi'rot akwothuk-wat cokwa akwi'rek itti, "Apaththa" ilaik itti, "Anyothe." <sup>35</sup> Nci cingang aunu wopul anyat ana thu're erekat ana kwikkatheik akwere nci nokküt.

<sup>36</sup> Aieccuo i'rekat kin lon lonthoththomat itti akin okorronno erene opilin aththik. Kwopakkukkentheth kin tit ma'ri moppot itti okin thakorronno ere lon len, anaruk okin theret nci nokküt. <sup>37</sup> Ul wokat cik aprttakot tit ai'rekat itti, "Kwokkothe lon appik loporot ook manna pothikkiet pul ipauril apocikot cik ana ipommat nthu're apere."

## 8

### *Oieccuo pa'rikie ul athar woco'rin*

*(Maththa 15.32-39)*

<sup>1</sup> Noma'ri men acungkut c'rek cri'k a'rntakat. Okin thellat a'rupu iakin o'rko, aieccuo akkarat ul iammakothok iccik kung ana kwi'rekathekin itti, <sup>2</sup> "Mpipot thiak thoul enni akka okin thounu ma'ri m'rapuruk onin aththut cene ana a'rupu wella iakin o'rko. <sup>3</sup> Amma mpothiothekin nokathar nti okin thapukkot ikathar, akka opilingon thaat nciththan."

<sup>4</sup> Aul iammakothok othiat tit itti, "Pul piot thu'rit kartha cene thomnther thekko nakin?"

<sup>5</sup> Aieccuo ipittat kin itti, "Onon thounu arrakith wornoththa?"

Akin othiat tit itti, "We're'rapuruk."

<sup>6</sup> Akwi'rekat cungkut coul itti okin thikkoik nocapu. Ana akka kwummot arrakith ie're'rapuruk akwopirakanthet Kapik noka akwomithat tit, akwekat ul iammakothok

aikket ul. <sup>7</sup> Okin thonat ape wotte iarran cakuruk kwopirakanthet Kapik noka akwi'rekat ul iammakothok itti willilline ulrit. <sup>8</sup> Ul wo'rkkathe ana wothhakakathe. Ana ul iammakothok wocumathe thu'rit ithokwentakot nan nyalünthüng nye're'rapuruk. <sup>9</sup> Ul wokat cik ca'ri cen athar woco'rin (4,000) maun moul iomura tulluk. Anakka kwothiothekin ikathar, <sup>10</sup> akwarrat ikuppu'rung konoi'ri akin oul iammakothok ana okin thoiŋkathethe nocik coThalamutha.

*Ul woPriccin wipitto lon ilommaththik*  
(*Maththa 16.1-4*)

<sup>11</sup> Ul woPriccin wakkakathe aikkat cik aipittot oieccuo lon itti kwakkinthet kin lon ilommaththik, okin thipittot elli othakka itti akin ennekkek. <sup>12</sup> Akwothukwat cokwa kiththik mono akwi'rekat itti, “Ngintha akka ul enni ipittine lon ilommaththik? Mpi'ret non ilaik icat, lon ilommaththik lella ilakkattanthet kin.” <sup>13</sup> Akwoththekat nakin, akwarrat ikuppu'rung konoi'ri akwoingkat nokuthut korok k'rek.

*Ul woPriccin ana oIruthuc*  
(*Maththa 16.5-12*)

<sup>14</sup> Ul iammakothok wurekathethe nan itti waneko arrakith arttot nan, okin thonat wulukku tulluk ikuppu'rung konoi'ri. <sup>15</sup> Aieccuo i'rekat kin lon nthokkwie lon kuru ncik itti, “No'rumoik nolon ilao noul woPriccin ana woIruthuc ilokkoik ere mü'rükül.”

<sup>16</sup> Okin therettaranthet akin i'rekat itti, “Kwi'ret ittina akka oron thella arrakith.”

<sup>17</sup> Aieccuo inakat nolon len akka okin therethe akwipittat kin itti, “Onon thontha akka annere itti onon thella arrakith? Onon tharthuk immaik ana inaiiki? Ma mon marthuk monthomari? <sup>18</sup> Onon thonu kit ana komma immaiki ana unu ana womma occikot ciki? Onon thakan-nokwarikori? <sup>19</sup> Akka mpomithinet ul iarrakith iokat

athar ukuluk, nyalünthüng nyornoththa inya'rntakotho nyothu'rit ithokwentuttakot nan?"

Akin othiät tit itti, "Attul ana ikken ke'ra."

<sup>20</sup> Aleccuo i'rekat itti, "Anakka mpomithinet ul iar-rakith ie're'rapuruk iokat athar woco'rin, nyalünthüng nyornoththa inyanon tha'rntothe nyothu'rit ithokwentuttakot nan?"

Akin othiät tit itti, "Nye're'rapuruk."

<sup>21</sup> Akwi'rekat kin itti, "Onon tharthuk inaiki?"

*Thanyinthet pul ipi'rimathe kit*

<sup>22</sup> Akin akkakat ciki Peththcceitha, aul w'rek onakat pul pi'rimathe akin ipittat oIeccuo itti kwathntok. <sup>23</sup> OIeccuo ponekatho pul ipi'rimathe nnukun akwoingkathok ngngin nocipit coricarak coman. Anakka kwothukkwothok nguk ikit ana onekket nyaun nyung naak, akwipittathok itti, "Ngkwimmat pap'reki?"

<sup>24</sup> Akwokathakat ithi'rot akwomekat itti, "Mpimmat ul, wungkot ere kira kaik kanyaro."

<sup>25</sup> Aleccuo apponekkekat nyaun nyung ikit kopul. Ca'ri cen kit kanyathe apimmakat cik, akwimmakat a'rupu ncik appik papenang. <sup>26</sup> OIeccuo pothiathok tuan akwi'rekathok itti, "Kirrnni eo icarak coman."

*OPoththuruc pantrina oIeccuo itti ook oMiccie*

*(Maththa 16.13-20; Lukka 9.18-21)*

<sup>27</sup> OIeccuo ana ul iammakothok thoingkathe na'ran iaik iccik koka'ran koKaiccaria Pilippi. Anakka okin thokat cik akin eo, aleccuo ipittat kin itti, "Ul were itti oun oththa?"

<sup>28</sup> Akin othiät tit itti, "Opilingon there itti, ounge oIuanna pomamuthie ana opilingon itti, oIia ana opilingon itti, ounge pul p'rek noul wothernte lon loKapik."

<sup>29</sup> Ana kwipittathekin itti, "Ana onon thi're itti oun oththa?"

APoththuruc othiät tit itti, "Ounge oMiccie."

<sup>30</sup> Aieccuo i'rekat kin itti, “Okin thakannerene pul p'rek lon lung.”

*Oieccuo peret thio thung*

*(Maththa 16.21-28; Lukka 9.22-27)*

<sup>31</sup> Kwikkatheik akwongkenekin itti ukul wopul iponyi wonu itti wareko thiak ma'ri moppot ana ul ittittik woul ana ul ittittik woul wonoppa toKapik ana ul iangkene lon lothonce'ret lon cik w'rak ana kwonu itti kwakkuttat ana noma'ri m'rapuruk kuroko nti ithio. <sup>32</sup> Kwerethe elli nci nokkit ana oPoththuruc onekat oieccuo thocipit pellek akwikkat cik akwere naak.

<sup>33</sup> Anaruk akka oieccuo poprttakot cik akwokathakat ul iammakothok, akwa'rettat naPoththuruc itti, “Ollu ntokit kin, pul pothopulut. Ngkwella lon loKapik ica cang anaruk ngkwonu lon loul ionyi.”

<sup>34</sup> Akwakkarat cungkut coul ana ul iammakothok akwi'rekat kin itti, “Amma opilin pongothe itti kwamakothin kwonu itti kure noka kung akwoneko thapak thung akwomakothin. <sup>35</sup> Okkwi ipongothe itti kwa'ret thikkoik thung, kuret cik anaruk okkwi ipurethe thikkoik thung cik nti ilon lin ana nti ilon iloporot loKapik, kwa'ret. <sup>36</sup> Ngintha akkoporot amma pul pothikkiet capu ncik appik cung ana kurethe calak cung cik? <sup>37</sup> Ngintha akka apul okucitto ncalak cung? <sup>38</sup> Okkwi ipothianin cik ana othiane lon lin cik nti iul enni ia'ro nul nuthuk ana tholon ilokithak, ukul wopul iponyi wa'ruminthok kit nothokaprttako thung nthrik thoththan ana nu'rupa wothothlettat woKapik iupupure.”

## 9

<sup>1</sup> Akwi'rekat kin itti, “Mpi'ret non ilaik icat itti opilignon th'rek ithaik thaco'ro cene thakannille aththik, akin tharthuk imma ngili ngoKapik aanthan mpu'ran.”

*Thoprttakoik thoIeccuo*  
*(Maththa 17.1-13; Lukka 9.28-36)*

<sup>2</sup> Anakka kwikkot cik ma'ri m'rakkuruk akwipat oPoththuruc ana oIakup ana oIuanna akwoingkat kin ngngin thellek ci no'ra woco'rong. Ana kwoprttakatheik tokit ken nan. <sup>3</sup> Ana eret wung wikkatheik allio thollio thapul pella pimet kret akolliat ittina nocapu ncik appik. <sup>4</sup> Ana ncinang oIia ana oMucca ummat ncik tokit ken akin ikkat cik akin erene oIeccuo.

<sup>5</sup> APoththuruc omekat oIeccuo itti, "Pul ipangkene loporot itti oron thikkoik cene. Tun uno mü'rük m'rapuruk, culukku cang ana culukku coMucca ana culukku collia." <sup>6</sup> Kwommat ila akwi're akka okin thaththonat n're kannan.

<sup>7</sup> Nci cınang anuththe o'rumat kin apo're akkakat nti inuththe api're itti, "Ukul win enni ia mpongothe, noccikothok."

<sup>8</sup> Anakka okin tholliakothaik akin okinnimmakat pul p'rek, oIeccuo pulluk.

<sup>9</sup> Anakka okin thokat cik akin uo ntan nnoco'rong, aIeccuo i'rekat kin itti okin thakanni'ret pul p'rek ilakin thimmat puccuk aukul wopul iponyi urokat nti ithio.

<sup>10</sup> Okin thangwathe lon len nomikit men akin ere itti, "Ngintha akkonu itti, thuroko nti ithio?"

<sup>11</sup> Ana okin thipittathe itti, "Ngintha akka ul iangkene lon lothonce'ret lon cik i'rene itti oIia ponu itti kwanthan tokit naMiccie?"

<sup>12</sup> AIeccuo othiat tit itti, "Ii itti, oIia panthan cittokit akwopakket lon cik appik. Ngintha akka lokurrakinet iatham itti ukul wopul iponyi wonu itti waccokot thiak kannan ana ul w'rak? <sup>13</sup> Anaruk mpi'ret non, oIia paat ana okin thokkwothok lon ilakin thaththongothe, ammakka lokurrakot alerethok."

*Thittiet ukul ia u'rupa iokithak wo'rot nan  
(Maththa 17.14–20; Lukka 9.37–43)*

<sup>14</sup> Anakka okin thainet ul iammakothok w'rek akin immakat cungkut coul iccik ken akin opllarot lon okin oul iangkene lon lothonce'ret lon cik. <sup>15</sup> Ana accokkot akka ul appik wimmat oIeccuo aprttakat tit kannan akin ollat taak othomiccok.

<sup>16</sup> Akwipittat kin itti, “Ngintha akka onon opllarot nan anaththungon?”

<sup>17</sup> Apul p'rek nti icungkut coul othiat tit itti, “Pul ipangkene, mponanung ukul win wau'rupa iokithak wo'rot nan ana wakannokorronno itti were. <sup>18</sup> Amma u'rupa iokithak wen wo'rot naak worrethok nocapu, ku're pok nti ithon ana ok'rellot kinyit thocipit akwollat ikapa. Mpipittothe ul iammakothung itti okin thakicce u'rupa iokithak wen ana okin thommakathe okicce.”

<sup>19</sup> Aleccuo othiat tit itti, “Nantokatha ul enni iakorronno occokot lon loKapik nomikit. Oron thikkoik uraththut manna kartha? Mparukot ilon lon manna kartha? Onanin ukul cene.”

<sup>20</sup> Akin onakanthok ukul. Akka u'rupa iokithak wimmat oIeccuo alliekat ukul ikapa accokkot apat nocapu aththaththarakat, au're pok nti ithon.

<sup>21</sup> Aleccuo ipittat oththan pokkul, itti, “Wonu ma'ri mornoththa akkot ittina?”

Akwothiat tit itti, “Nci ammakka wotteik. <sup>22</sup> U'rupa iokithak waarrethok ithik ana i'ri appinappin itti wakkwothok. Anaruk amma oung akkakkot lon, ipi thiak thän aittarot nän.”

<sup>23</sup> Aleccuo i'rekat itti, “Amma oung akkakkot lon? Lon appik lathakkane pul lippappat amma poccokothe lon loKapik nocikit.”



<sup>24</sup> Aththan pokkul i'rekat accokkot mpo're cittan itti, “Mpocokothe lon loKapik nocikit. Ittarothin anokitto lon ila annokorronnon anocokot lon loKapik nocikit.”

<sup>25</sup> Anakka oIeccuo pimmat cungkut acollo othokatha ilokkattathe, akwothirriekat u'rupa iokithak cik itti, “U'rupa iammie ul nthon ana othikkiekin nuril, mpi'renon itti, noppot thapat nti iaak, nokorronno appopakot iaak ca'ri c'rek.”

<sup>26</sup> Au'rupa iokithak ekat ngeme nti ikkul alliekat ikapa arrekot ukul nocapu appat thapat nti ikkul. Akul ikkat cik ere wiot. Aul woppot i'rekat itti, “Kwiot.” <sup>27</sup> Anaruk oIeccuo pocokathe ukun wung akurokwiekathok kapik aco'rat.

<sup>28</sup> Anakka oIeccuo pi'rikot noppa aul iammakothok ipittathok pellek itti, “Onin thannokicce u'rupa iokithak nti ikkul akaintha?”

<sup>29</sup> Akwothiat tit itti, “U'rupa iokithak ionu pangken empi wakicetta nga'rama tulluk.”

*OIeccuo papperet thio thung attang*

*(Maththa 17.22-23; Lukka 9.44-45)*

<sup>30</sup> Akin oththekat noka'ran ken akin oingkat okko nocik coCelil. OIeccuo pappakannangkot itti pul p'rek pina nakin thaik, <sup>31</sup> akka kwokat cik akwongkene ul iammakothok. Akwi'rekat kin itti, “Ukul wopul iponyi waik wathokettat ul ionyi. Okin thakkwothok ana noma'ri m'rapuruk wuroko nti ithio.” <sup>32</sup> Anaruk okin thommat ila kwi'rethekin ana okin thonakathe n're ipittothok.

*Oththa akkrik?*

*(Maththa 18.1-5; Lukka 9.46-48)*

<sup>33</sup> Okin thakkakathe ciki noka'ran koKapprnaum. Akka kwokat noppa, akwipittat kin itti, “Ngintha akka onon thokat cik annopllarot ngngin ikathar?” <sup>34</sup> Anaruk okin

thangkatheik akka okin thokat cik akin opllarot nokathar mai itti oththa akkrik.

<sup>35</sup> Akwikkat cik akwakkarat ul iammakothok iattul ana ikken ke'ra akwi'rekat kin itti, “Okkwi ipongothe itti kwathakka priik, cittokit kwonu itti kwaka potteik ana orekine ul appik.”

<sup>36</sup> Akwonekat ukul iotteik akwoce'rekat itho'rküt then. Akwonekat nokapen akwi'rekat kin itti, <sup>37</sup> “Okkwi ipikkiet opilin cik nti iakkwion enthi itharran ngk'ran kin kwikkierin cik ana okkwi ipikkierin cik, kwaik pakinnikkien cik anaruk kwaik pikkie okkwi ipothiöthin cik.”

*Pul ipakannothatto iaron ook ponnon*

*(Lukka 9.49-50)*

<sup>38</sup> Aiuanna i'rekathok itti, “Pul ipangkene, onin thimmat pul p'rek apokicce u'rupa iokithak ngk'ran kang ana onin thoce'rerek akka kwannoka ponnon.”

<sup>39</sup> Aieccuo i'rekat kin itti, “Nokorronno oce'rek. Pul pella ipakkot lon ilommaththik ngk'ran kin ana noma'ri motte apapperethin llon ilokithak. <sup>40</sup> Akka pul ipakan-n'raron ook ponnon. <sup>41</sup> Mpappi'ret non lon ilaik icat itti okkwi ipethet non keththe'ret koi'ri ngk'ran kin akka onon ul woMiccie, kwakannuret thocco lon iloporot lung cik.”

*Thokkiet ul lon ilokithak*

*(Maththa 18.6-9; Lukka 17.1-2)*

<sup>42</sup> “Ana amma opilin pokorronnot okkwion itharran ithoccokotho lon lin ammakka enthi akin okkot lon ilokithak laka loporot itti kwarrettat irok irapangka ncna ca'rettanok icalak. <sup>43</sup> Amma ukun wang wakorronnong akkot lon ilokithak, okiotheik akka loporot itti ngkwikkoik nukun wulukku nothona nyaun nye'ra ana ngkwawao ngngnin ithik thothothürin ithomma io. <sup>44</sup> [Na nangak ina'rko kin okorronno ille ana thik thakinnio.]

<sup>45</sup> Ana amma wek wang wakorronnong itti ngkwakkot lon ilokithak, okiotheik akka loporot itti ngkwikkoik ponu wek wulukku nothona tacok te'ra ana ngkwarrettat ngngin ithik thothothir'in. <sup>46</sup> [Na nangak ina'rko kin okorronno ille ana thik thakannio.] <sup>47</sup> Ana amma cit cang cakorronnong itti ngkwakkot lon ilokithak, onthotheik nti ica akka loporot itti ngkwawo ingili ngoKapik ncit culukku, nothona kit ke'ra ana ngkwarrettat ngngin ithik thothothir'in.

<sup>48</sup> 'Na nangak ina'rko kin okorronno ille ana thik thakannio.'

<sup>49</sup> Onon appik thathikkietta tho'rillir nthik.

<sup>50</sup> Nguculoththu ngoporot anaruk amma ngothakkat ngocalang, ngappothikkietta ngira taththa? Nikkoik tho'rillir tokit koKapik ana oka ilon iloporot noulon ithun."

## 10

### *Lon lothothio pari nti ithari*

*(Maththa 19.1-12)*

<sup>1</sup> Oieccuo poththekathe noka'ran ken ana kwoingkathe nocik colouthia ana arrot cik Iuruthun. Acungkut coul appakkakat naak attang ana kwongkenekathekin ammakka appinappin.

<sup>2</sup> Ul w'rek woul woPriccin akkakat appennekkekat hok nthipitto itti, "Loco'rotheik itti pul pathio pari pungi?"

<sup>3</sup> Akwothianthet kin tit itti, "OMucca pi'rethenon taththa?"

<sup>4</sup> Akin i'rekat, itti, "OMucca pokorronnot itti pul ipocura pakurrine pul ipopari ka'rmacak kothothia ko akwantothiook."

<sup>5</sup> Aieccuo i'rekat kin itti, "Lokat akka mikit mon mokat monthomat ana ittina oMucca pokurrinet non lon

lothonce'ret lon cik elli. <sup>6</sup> Anaruk nci nothoku're capu ncik, 'Kapik kokkothe pul ipocura ana ipopari.' <sup>7</sup> 'Ilen akka pul ipocura oththene naththan ana onnan <sup>8</sup> ana okin aththuththe'ra thathakka ka kulukku.' Ittina okin thakannoka the'rarit anaruk okin thulukku p'r'in. <sup>9</sup> Ittina ila Kapik kokottothe apul ella ipillorit."

<sup>10</sup> Anakka okin thappropakkot tuan, aul iammakothok ipittathok lon len. <sup>11</sup> Akwothiät tit itti, "Okkwi ipothiöt pari pung ana akwappipo ap'rek kwaik pa'ro nnul iari ittat. <sup>12</sup> Ana amma pul ipopari pothiöt olle ana akwothitta nap'rek kwaik pa'ro ul iomura ngngin ionu ari."

*Oieccuo pethie nyukul inyarran*

*(Maththa 19.13–15; Lukka 18.15–17)*

<sup>13</sup> Ul wokat cik annane oieccuo nyukul inyarran itti akwathonekket nyaun nakin anaruk ul iammakothok wikkatheik a'retto nakin. <sup>14</sup> Anakka oieccuo pim-mat elli akuakat ka. Akwi'rekat kin itti, "Nokorronno nyukul inyarran anyainin, nokorronno oce'rekin akka ngili ngoKapik ngoul iammakka enni. <sup>15</sup> Mpi'ret non ilaik icat itti okkwi ipannocco ngili ngoKapik ammakka nyukul inyarran, kwanni'rikorit." <sup>16</sup> Ana kwonakathe nyukul thocarak cung akwonekkekat nyaun nakin akwethiekat kin.

*Pul ipapa'rthan*

*(Maththa 19.16–30; Lukka 18.18–30)*

<sup>17</sup> Akka oieccuo purokot akweo, apul p'rek ollat taak apekat ungu ncik tokit kung apipittat itti, "Pul ipangkene ipoporot, ngintha akka anokkot aniot thikkoik thothupuththuput?"

<sup>18</sup> Aieccuo othiät tit itti, "Ngintha akka akkarinin itti pul ipoporot? Pul pella ipoporot, Kapik kulluk akkoprot

peltek. <sup>19</sup> Ngkwina lon ila Kapik ki'ret itti, 'Kirrnni okkwot pul, kirrnni a'ro mpul ipittat, kirrnni omunye, kirrnni ere lon ngkarra, kirrnni okwïet, othianet onne ana oththe cik.' ”

<sup>20</sup> Apul pen i'rekat itti, “Pul ipangkene, mpokkothe elli appik nciki akka mpokat ampotte.”

<sup>21</sup> Aieccuo okathakathok akwongakathok akwi'rekat itti, “Laik lulukku langkwarthuk okkot, ngko athokette a'rupu wang iangkwonu appik aikket ul iella a'rupu cik ana ngkwipo tha'rthan tothi'rot, anthan antath-omakothin.”

<sup>22</sup> Nolon elli aroca topul oprttakat cik. Akwoingkat akua ka kannan akka kwokat papa'rthan.

<sup>23</sup> Aieccuo okathakat ul iammakothok ammrththakot cik akwi'rekat kin itti, “Lonthomat itti pul ipapa'rthan pi'riko ingili ngoKapik.”

<sup>24</sup> Aul iammakothok oprttakanthet lon lung anaruk oieccuo pappi'rekat kin itti, “Nyukul nyin, thi'riko ingili ngoKapik thommaththik. <sup>25</sup> Lippappat itti thamla thakko icürük coipra nopol ipapa'rthan itti pi'riko ingili ngoKapik.”

<sup>26</sup> Ul iammakothok woprttakatherit kannan akin erettarne itti, “Oththa akka'rettat?”

<sup>27</sup> Aieccuo okathakat kin akwi'rekat itti, “Elli lonthomat nopol iponyi anaruk noKapik, lon appik lakan-noka lonthomat.”

<sup>28</sup> APoththuruc i'rekathok itti, “Onin thoththet na'rupu appik othakka itti anin omakothung.”

<sup>29</sup> Aieccuo othïat tit itti, “Mpi'ret non lon ilaik icat, okkwi ipoththet nokaman kung ana opangon ithomura ana ithari ana oththan ana onnan ana nyukul nyung ana opon, nti iaun ana nti ilon iloporot loieccuo <sup>30</sup> kwacco kaman koppot ana opangon ithomura ana ithari ana onnan ana nyukul ana opon ana thokkiettat thiak ana

noluput ilanthan thikkoik thothupuththuput. <sup>31</sup> Anaruk ul woppot iaik tokit inenni wathoka thoceken ana ul woppot iaik thoceken inenni wathoka tokit.”

*Oieccuo papperet lon lothio thung*  
(*Maththa 20.17–19; Lukka 18.31–34*)

<sup>32</sup> Okin thokat ikathar akin oku'rot noka'ran koU-rucelim aleccuo pokat tokit ken ana ul iammakothok oprttakat tit ana ul w'rek iokat ammakot kin wonat n're, akwappakkarat ul iammakothok iattul ana ikken ke'ra thocipit akwappi'rekat kin ilaik lathainok. <sup>33</sup> Akwi'rekat itti, “Noccikot, oron thaik thaku'rot noka'ran koUruccelim ana ukul wopul iponyi wakettat ul ittittik woul wonoppan toKapik ana ul iangkene lon lothonce'ret lon cik. Okin thakkmak itti kwakkuttat akin ekathok ul iakonnoka wolouth, <sup>34</sup> okin ithakkothok ngure ngngin ana othukkothok nguk, okkwekok ana okkwothok. Ana noma'ri m'rapuruk kwuroko nti ithio.”

*Thipitto thoiakup ana tholuanna*  
(*Maththa 20.20–28*)

<sup>35</sup> Oiakup ana oLuanna nyukul nyoCepethi nyakkakanthok akin i'rekat itti, “Pul ipangkene, onin thongothe itti ngkwittarot nin.”

<sup>36</sup> Akwipittat kin itti, “Ngintha akka onon thongothe itti mpakkinthet non?”

<sup>37</sup> Akin othiat tit itti, “Kirrnni okkulukku nti ianin akwikkoik thokkun wothothari wang ana opilin thokkun wothokure nothrik thang.”

<sup>38</sup> Aleccuo i'rekat kin itti, “Onon thomma ilanon thaik thipitto, onon thikko nti ikeththe'ret ika anikko ntiri thaccokot thiak itha mpaik pathocokot nani ana mannaocco mamuthie ima ampoccori?”

<sup>39</sup> Akin othiat tit itti, “Ii onin thaccokot thiak.”

Aieccuo i'rekat kin itti, “Onon thikko nti ikeththe'ret ika anikko ntiri ana occo mamuthie ima mpoccori,<sup>40</sup> anaruk thikkoik thokkun win wothothari ana manna wothokure oun akkakkorronno i're. A'ran enni woul wonekkettanthe kin cik.”

<sup>41</sup> Manakka okin ithattul thocci'kothe elli akin uakat ka kolakup ana koluanna. <sup>42</sup> Oieccuo pakkarathekin tothun akwi'rekat kin itti, “Onon thina ul inako itti wanili noul iakonnoka wolouth nonu lon loul wen ikkun ana nili nen inittinittik narekiekin llon len. <sup>43</sup> Lakannoka ittina ianon. Okkwi ipongotho itti kwathakka priik ianon kwonu itti kwarekine opangon th'rek, <sup>44</sup> ana okkwi ipongotho itti kwathakka cittokit kwonu itti kwathakka piak poul appik. <sup>45</sup> Akka manna oun ukul wopul iponyi wakannao itti wathorekakine anaruk itti wathoreko ana manna io othakka itti aelikko ul woppot nti ilon ilokithak.”

*Oieccuo panyinthe oPerththemaoc kit  
(Maththa 20.29–34; Lukka 18.35–43)*

<sup>46</sup> Ittina akin akkakat noka'ran kAria. Anakka oIeccuo ana ul iammakothok ana cungkut coul thokat cik akin oththe nocik apul p'rek pi'rimathe poccot k'ran oPerththemaoc ukul woThthimaoc wokat cik aikkoik nocipit cokathar akwipittot ul a'rupu. <sup>47</sup> Akka kwocci'kothe itti oieccuo poNaccir, akwikkat cik akwakkaro mpo're cittan itti, “Oieccuo ukul woThauth ipi thiak thin.”

<sup>48</sup> Akin erekat naak thoppot itti kwangkoik anaruk kwikkathik akwakkakaro kannan itti, “Ukul woThauth ipi thiak thin.”

<sup>49</sup> Aieccuo oco'rat akwi'rekat itti, “Nakkarok.”

Akin akkarat pul ipi'rimathe, “Opo'rathan aurokot kapik, occiri, kwaik pakkarong.” <sup>50</sup> Akworrekate kret kung ika akwoku'rupakot nocipit akwirrat ntacok oine oieccuo.

<sup>51</sup> Aieccuo ipittathok itti, “Ngintha akka ongkwongotho itti mpakkinhung?”

Apul ipi'rimathe i'rekat itti, “Pul ipangkene, mpongothe itti mpimmaik.”

<sup>52</sup> Aleccuo i'rekathok itti, “Ngko, thocokot lon loKapik nocikit cang thothikkierung poporot.” Nci cĭnang akwim-makat cik akwomakat oIeccuo nokathar ken.

## 11

*Thi'riko thoIeccuo noka'ran koUruccelim  
(Maththa 21.1-11; Lukka 19.28-40; Iuanna 12.12-19)*

<sup>1</sup> Anakka okin okko ciki iccik koUruccelim okin thakkakathe noka'ran koPeththppaci ana koPeththania noco'rong coCeththun, aleccuo othiat ul we'ra nti iul iammakothok, <sup>2</sup> akwi'rekat kin itti, “Ngkonon noka'ran engkrĭk tokit kon ana amma anni'rikorit, onon thiot nge'ringka iotte ngĭ'rikakot ana ngarthuk arakot tan annok'ro annonanin cene. <sup>3</sup> Ana amma pul p'rek pipittothenon itti, ‘Onon thaik thak'ro nge'ringka iotte akaintha?’ anni'rethok itti, ‘Ili akki'ret itti onin thathok'ro ana kwathĭot ntan accokkot.’”

<sup>4</sup> Akin oingkat akin othiat nge'ringka iotte ngĭ'rikakothe nocürük thapat ikathar. Akka okin thok'rot <sup>5</sup> aul w'rek wokat cik aco'ro cĭnang ipittat kin itti, “Ngintha akka annok'rĭne nge'ringka iotte?” <sup>6</sup> Akin othiat tit ammakka oIeccuo pi'rethekin ana ul wokorronnathekin akin eo. <sup>7</sup> Akka okin thonanet oIeccuo nge'ringka iotte akin ongku'rupat eret nan wen ne'ringka iotte akwarrat tan akwikkat cik noret. <sup>8</sup> Ul woppot wongku'rupathe eret wen cik ikathar ana opilingon ongatho u'ri wokira nti ipon akin ipot cik ikathar. <sup>9</sup> Ana okkwion itheot tokit ana okkwion ithomakothekin thi'rekathe mpo're cittan itti, “Athopira noka oka noKapik tothi'rot.”



“Athethietta oka nakkwi ipanthan ngk'ran kolli!”

<sup>10</sup> “Athethietta oka nongili iaik nganthan ngongappa ponnon oThauth.”

“Athopira noka oka noKapik tothi'rot.”

<sup>11</sup> Aleccuo i'rikat noka'ran koUruccelim ana kwoingkathe noppa toKapik. Akwokathaccek a'rupu ap-pik anaruk akka cik cokat ceot kwopakathe noka'ran koPeththania okin oul wung iattul ana ikken ke'ra.

*Oleccuo pattatta pira popiciit*  
(*Maththa 21.18-19*)

<sup>12</sup> Ngorrot ngen akka okin thokat cik akin oththe noka'ran koPeththania oleccuo pokakathe piamat. <sup>13</sup> Akwimmakat picit natha nan akwoingkat akwothokathakat amma ponat nyukul nyen, akka kweot iccik ken akwokinnyat pap'rek nan anaruk natha nulluk akka okorronno oka thuput thopira itti partha. <sup>14</sup> Ncinang akwi'rekat pira itti, “Apul pella ipa'rko nyukul nyang noca'ri c'rek.” Aul iammakothok occikat akka kwi'ret.

*Oleccuo pakicce ul iakette noppa toKapik*  
(*Maththa 21.12-17; Lukka 19.45-48; Iuanna 2.13-22*)

<sup>15</sup> Anakka okin thi'rikot noka'ran koUruccelim oleccuo pi'rikathe noppa toKapik ana kwokiccekathe okkwion ithokat cik akin okette a'rupu ana ithonat a'rupu icekerek ceneket. Kwongku'rupathe uppu'rung cik woul iokat akucitto akucci ana orrok wokkwion ithokat akin okette mulökkür. <sup>16</sup> Ana kwakanno okorronnat okkwion ithonat a'rupu iaketta akin okko noppa toKapik. <sup>17</sup> Anakka kwongkenet kin akwi'rekat itti, “Lokurrakot itti, ‘Man min makkarako itti man ma'rama moul appik.’”

Ana onon thothikkiet man moul wothu'ran.”

<sup>18</sup> Ul ittittik woul wonoppa toKapik ana ul iangkene lon lothonce'ret lon cik occikat elli akin ikkat cik akin okwancot kathar ikakin okkwothok ngngin akka okin thapellenok, akka ul appik woprttakinthet thongkene thung tit.

<sup>19</sup> Anakka cipin capot akin oingkat thapat nti icarak coman conoka'ran koUruccelim.

*Picit iponthomatheik*

*(Maththa 21.20–22)*

<sup>20</sup> Ana ngi'rimak akka okin thokat cik akin omakot kathar akin immakat picit apponthomat ncik ilaka len.

<sup>21</sup> APoththuruc okwarikat pira akwi'rekat oIeccuo itti, “Pul ipangkene, antokatha pira popicit ipangk wattat ponthomat.”

<sup>22</sup> Aleccuo opakkekat tit itti, “Nocokot lon loKapik nomikit. <sup>23</sup> Mpi'ret non ilaik icat, amma opilin pi'rethe co'rong enci itti, ‘Ngko arret ka kang irok irapangka,’ ana ella lon tit le'ra nocikit, anaruk ngkwoccoke the lon nocikit itti ila ngkwi'ret itti lathakka ana lakkattanthung.

<sup>24</sup> Ittina mpi'ret non itti, ilanon thipittot ngnga'rama nonek ket nomikit itti nthiot ana lakanenon. <sup>25</sup> Ana amma annoco'ro anna'ra nga'rama anthonu lon l'rek nomikit mon napilingon nocikot kin othakka itti aththe pon porothi'rot occikinthe non lon lon ilokithak cakuruk.”

<sup>26</sup> [Ana amma onon thakannocikinthe kin lon ilokithak ilakin thokkinthe non, oththe pon pakannocikinthe non lon lon ilokithak cakuruk.]

*Nili nipittot oIeccuo lon longili*

*(Maththa 21.23–27; Lukka 20.1–8)*

<sup>27</sup> Akin okkaprttakat noka'ran koUruccelim anakka oIeccuo pokat cik akwonyaro noppa toKapik, ul ittittik

woul wonoppa toKapik ana ul iangkene lon lothonce'ret lon cik ana ul ittittik woul akkakanthok. <sup>28</sup> Akin ipittathok itti, “Nnggili ngiatha ingakkot llon elli? Ana oththa akkethung ngili itti ngkwakkot elli?”

<sup>29</sup> Aieccuo opakkekanthet kin tit itti, “Mpipittot non lon lulukku. Nothinthin tit ana mpakenenon itti nnggili ngiatha akka anokkot nelli. <sup>30</sup> Mamuthie moLuanna mokat nnoKapiki ana amma okorronno oka nnoKapik ana noul ionyi? Ni'rethin.”

<sup>31</sup> Akin erekat thellek akin i'rekat itti, “Amma oron thi'ret itti, ‘NoKapik’ kwipittot ton itti, ‘Ana onon thonin akka nth'rat occokot lon lung nomik'it mon?’ <sup>32</sup> Anaruk oron thakinni're itti, ‘Noul ionyi.’” Okin theret elli akka okin thonat n're noul akka ul winat itti oLuanna pokat pul pothernte lon loKapik icaricat.

<sup>33</sup> Menik akin othianthet oieccuo tit itti, “Onin thomma.”

Aieccuo i'rekat itti, “Oun cakuruk pakanni'ret non itti nnggili ngiatha akka anokkot nelli.”

## 12

*Thokkwie lon kuru ncik thoul iara*  
(*Maththa 21.33–46; Lukka 20.9–19*)

<sup>1</sup> Nci cinang kwikkatheik akwerenekin okkwienekin lon kuru cik itti, “Pul p'rek pokat cik pocikkarot kira komaa ikkwon kung apu'rakat nan ana kwokkanthet ka'ran na akwathu'rukot ng'ri ngen ana kwapprunat ka'ran na pul ikkoik apangwot maa. Akwekat ul w'rek ara tit aikkethok maa nnan imakin thorat amma okin thokiot. Ana kwoingkathe nokurtti. <sup>2</sup> Ana noca'ri cothokio akwothianthet ul iara wen pul pung iparekinok itti patha'rntot a'rupu nakin io'riat. <sup>3</sup> Anaruk okin thoc-cokathok akin okkwekathok akin opakkekathok nyaun ncürük. <sup>4</sup> Akwothianthet kin pul ipareko p'rek akin

okkwat ci ca ana okkiet thiak lon lokithak. <sup>5</sup> Akwappothiät ap'rek icci, akin okkwat opaththi pen. Akwappothiät opilingon thoppot, akin okkwekat opilingon ana ongwo opilingon.

<sup>6</sup> Akwokwentakanthet pul pulukku ipa akwothiöt, ukul wung ia kwongothe. Ana kwothiathe ukul wung p'rïn ocothot akwopri okin thathiane cik akka ukul wung.

<sup>7</sup> Anaruk ul woropon werekathe ithun itti, 'Ook empi ipapakkot na'rupu woiththan ton okkwothok ana a'rupu wung wathakka wonnon.' <sup>8</sup> Ittina okin thonekathok akin okkwathok akin orrekathok thapat nti ikkwon.

<sup>9</sup> Ngintha akka pul pokkwon okkot? Kwanthan akwongwo ul worikkwon akwethet ul w'rek kopon. <sup>10</sup> Onon thakorronno akkakkaro lon ilaik iatham woKapiki? Li're itti, 'Pothok ipa ul iuno w'rat nti ipangken pothakkakathe cillang icace'ret kunthong tan.

<sup>11</sup> Ili wokkothe elli ana loprttakietheron tit.”

<sup>12</sup> Okin thokat thongothe itti okin thaccokothok akka okin thinat itti thokkwie lon kuru ncik, thokat cik atheret kin. Anaruk okin thonat n're nocungkut coul ana okin thoththekathe naak ana okin thoiŋkathē.

*Thethet oKkaiccer akucci wotha'rntot  
(Maththa 22.15-22; Lukka 20.20-26)*

<sup>13</sup> Ana noma'ri motte, akin othiät ul w'rek woPriccin ana ul iongothe lon loIruthuc itti wathi'rak llon. <sup>14</sup> Okin thakkakanthok akin i'rekat itti, “Pul ipangkene, onin thina itti oung pul ipi're lon ilaik icat ngkwella n're nopul iponyi, ngkwakannokkwine lon loul kunu ncik itti okin okkwengon, anaruk ngkwangkene lon ilaik icat ammakka Kapik kongothe. Loco'rotheik itti oKkaiccer

pa'rintakinthet akucci? <sup>15</sup> Onin tha'rintinthoki, onin thakanna'rintinthoki?"

Anaruk aleccuo inakat itti okin thongothe itti okin thaccokothok llon len, akwi'rekat itti, "Ngintha akka annenekkene itti onon thaccokinthin? Nantokenen thinar anokatha." <sup>16</sup> Akin onakat kakucci akwipittat kin itti, "Purrut poththa empi? Ana k'ran koththa engki?"

Akin othiat tit itti, "poKkaiccer."

<sup>17</sup> Nci cinang aleccuo i'rekat kin itti, "Nethet oKkaiccer a'rupu woKkaiccer ana woKapik annethet Kapik."

Ana okin thoprttakatherit naak.

*Thipitto lon lothuroko nti ithio*

*(Maththa 22.23-33; Lukka 20.27-40)*

<sup>18</sup> Ittina aul woCcathukkin iame itti thuroko nti ithio thellaik akkakanthet oleccuo nthipitto. <sup>19</sup> Akin ipittat itti, "Pul ipangkene, oMucca pokurrinet nin itti amma opang popul piot nopari ana pella nyukul, opang ponu itti kwapakkot nan akwokwonine opang ipiot nyukul. <sup>20</sup> Ca'ri cen ul w'rek wokat cik we're'rapuruk woththan pulukku. Okkwi iprik pipot pari akwiat, akkwella nyukul. <sup>21</sup> Ana akkwi ipomakothok opakkat nopari ana kwiathe caku-ruk akkwella ukul lokathe menik napang ipomakotho. <sup>22</sup> Nti iul ie're'rapuruk ionu oththan pulukku, opilin pellat ipokwonot ukul nti ipul ipopari. Ana pul ipopari piathe acakuruk. <sup>23</sup> Noca'ri cothuroko nti ithio pari paka poththa nti iakin? Akka pokat pittat nnul we're'rapuruk."

<sup>24</sup> Aleccuo othiat tit itti, "Onon thommaik akka onon thomma lon latham wopu'ran poKapiki? <sup>25</sup> Amma okin ithillet thurokot nti ithio okin thakannipo ana okin thakinnitta, okin thaka ere u'rupa woththilet-tat woKapik tothi'rot. <sup>26</sup> Ana nolon lothuroko nti ithio onon thakannakkakkaro lon lokerung kopira ipokat apok'ro iatham woMuccai akka Kapik ki'rethok itti, 'Oun

Kapik kApreim ana Kapik koIccaak ana Kapik koIakupi'?  
<sup>27</sup> Kwakannoka Kapik koul illet, anaruk Kapik koul iaik  
 ngkit thapat. Onon thamoloko kannan."

*Lon iloporot iloco'rotheik loKapik*  
 (Maththa 22.34-40; Lukka 10.25-28)

<sup>28</sup> Apilin nti iul iangkene lon lothonce'ret lon cik  
 loKapik akkakat akwocikat kin akin eret lon len. Ak-  
 winakat itti oIeccuo pothinthet ul woCcathukkin tit pa-  
 penang akwipittathok itti, "Nti ilon appik ilonek-  
 tatheik ilonthomat loKapik, liatha akkoporot kannan?"

<sup>29</sup> Aleccuo othiat tit itti, "Elli akkoporot kannan,  
 'Ul woIccereil, nocikot Ili Kapik konnon, Ili wulukku.  
<sup>30</sup> Ongathe Ili Kapik kang ncikit cang appik ana ngka  
 kang appik ana ngathe're ngang appik ana mpu'ran pang  
 appik.' <sup>31</sup> Ana ilamakot li're itti, 'Ongathe ul w'rek  
 ammakka ngkwongotho ka kang.' Lella iloporot kannan  
 nelli alule'ra."

<sup>32</sup> Apul ipangkene lon lothonce'ret lon ncik othiat tit  
 itti, "Loporot pul ipangkene, lon lang laik icat itti Kapik  
 kulukku ana ak'rek kella, anaruk ook pulluk. <sup>33</sup> Ongathok  
 ncikit cang appik ana ngathe're ngang appik ana mpu'ran  
 pang appik, ana ongat ul w'rek ammakka ngkwongotho  
 ka kang ilen akkoporot kannan na'rupu appik iok'rettanet  
 Kapik ana a'rupu wothokinthet Kapik nguccuk cik."

<sup>34</sup> Anakka oIeccuo pimmat itti kwothiotherit nthi-  
 naik nti ica, akwi'rekathok itti, "Ngkwakannoka ciththan  
 nongili ngoKapik." Ana nci cinang ul w'rek wellakathe itti  
 wappittothok lon l'rek.

*OMiccie ukul woththa?*  
 (Maththa 22.41-46; Lukka 20.41-44)

<sup>35</sup> Anakka oIeccuo pokat cik akwongkene noppa toKapik, kwipittathe itti, “Taththa akka ul iangkene lon lothonce'ret lon cik i'rene itti oMiccie ukkul woThauth?

<sup>36</sup> OThauth ngka kung peret ngKanang ikupupure itti, ‘Ili Kapik wi'rethe Ili win,

    Ikkik thokkun wothonhari win  
puccuk anonekkekat tho'rak thang  
    thoceken coracok tang.’

<sup>37</sup> OThauth ngka kung pakkarat oMiccie itti, ‘Ili win’ ana tat akka akwoka ukul wung?’”

Cungkut coul coccikathok okkwinok kunu ncik akin thopirat noka.

*No'rumoik noul wolon lothonce'ret lon cik  
(Maththa 23.1-36; Lukka 20.45-47)*

<sup>38</sup> Akka kwongkenet kin akwi'rekat itti, “No'rumoik noul iangkene lon lothonce'ret lon cik okin thongothe itti okin thanyaro neret iukwirukwit ana omiccako kec-cuk <sup>39</sup> ana ikkoik na'ran wothonthiagine cik nomuththun ma'rama ana nokamuthe. <sup>40</sup> Okin thammikkot muruma ana onnekot kin kaman ken ana a'ra nga'rama aul imma kin appik, ul ammakka enni wakkiettat thiak kannan.”

*Curuma icopari cethet Kapik a'rupu  
(Lukka 21.1-4)*

<sup>41</sup> Aleccuo pokat cik akwikkoik akwokathacce ul iannekket akucci noka'ran kotha'rntot akucci ia'rn-takinthet ngre ngonoppa toKapik, ul ia'rthan woppot wonekkekathet akucci woppot. <sup>42</sup> Anaruk pul p'rek ipa curuma pakannoka papa'rthan pakkakathet aponekkekat akucci we'ra wokit.

<sup>43</sup> Aleccuo akkarat ul iammakothok akwi'rekat kin itti, “Mpi'ret non ilaik icat, pul empi ipa curuma ponekkethe akucci woppot kannan noul appik. <sup>44</sup> Okin thonekkethe

notha'rthan then, anaruk curuma enci icopari icella a'rupu cik conekethe nna'rupu ia kwonat appik, iarokat cik itti kwikkoik ngngin.”

## 13

*Oieccuo peret thokittako thonoppan toKapik  
(Maththa 24.1-2; Lukka 21.5-6)*

<sup>1</sup> Anakka kwokat cik akwoththe noka'ran konoppan toKapik, apilin nti iul iammakothok i'rekathok itti, “Pul ipangkene, antokatha, akka mothok imittimittik ana kaman kopeththere.”

<sup>2</sup> Aleccuo othiat tit itti, “Onon thimmat kaman engi ikittittik appiki? Pothok pella pulukku pakwentako nopangken, müntat nocapu mulumuluk appik.”

*A'rupu iakaik aleccuo parthuk okkaprttako  
(Maththa 24.3-14; Lukka 21.7-19)*

<sup>3</sup> Anakka oieccuo pokat cik akwikkoik noco'rong co-ceththun icakatha noppa toKapik, oPoththuruc ana oIakup ana oIuanna ana Anthrauc ipittathok therek itti, <sup>4</sup> “I'rethenin itti lon elli lakaik acintha? Ana lon liatha ilakene itti lon elli lathokaik?”

<sup>5</sup> Aleccuo i'rekat kin itti, “No'rumoik akka apilin ammikkot non. <sup>6</sup> Okin thoppot thanthan ngk'ran kin akin i're itti, ‘Oun oMiccie’ ana okin ammikkot ul woppot. <sup>7</sup> Nokorronno ona n're amma onon thocckithe itti tho'rak thaik ana karra kotho'rak, lon ila ammakka elli lakaik anaruk ca'ri carthuk anthan. <sup>8</sup> Ul nomo'rong m'rek aprttakot iul wonomo'rong m'rek ana ngili ngaprttakarot tit. Tha'rintittako thocapu ncik appik thakaik na'ran woppot ana ti takaik. Elli laka ere thok'rellako thokkul jakwonta thonomun. Lon elli lakene itti lon ilaik lanthan lantruko ncik.



<sup>9</sup> Onon thouu itti onon tha'rumoik. Onon thikkettat nili ana akin okkwet non nomuththun ma'rama. Onon thanekittat tokit konili inarran ana inittinittik nti ilon lin. Anaruk loporot othakka itti annokenekin lon lin.

<sup>10</sup> Ana lon iloporot loIeccuo lonu itti langkenetta ul nomothok appik cittokit. <sup>11</sup> Amma onon thocciccokit-tathe ana onekittat imakkma, nokorronno ipo n're itti onon thathi're itti tat. Ni're lon ilettathenon noca'ri cen itti onon thi're, akka onon akkakannoka thaik there, anaruk Kanang ikupupure.

<sup>12</sup> Ukul wakero opang akwokkuttat ana oththan pokkul okero ukul wung akkuttat. Nyukul nyaprttakot iaththangon akin okorronno kin akin ongutta. <sup>13</sup> Ul appik w'ranon nti ilon lin, anaruk okkwi ipoccoke the cikit ilon puccuk mono alocothakat ana kwa'rettat.”

*Thoccokot thiak*

*(Maththa 24.15–28; Lukka 21.20–24)*

<sup>14</sup> “Amma onon thimmat lon lothokittakoik lurokot noka'ran ika lon akkira akkakannoka nan (aul iakkakkaru iatham ina lon len) nokorronno okin ithaik noththok polouthia akin ollot to'ra womo'rong. <sup>15</sup> Nokorronno okorronno opilin ipaik to'ra woman mung itti kuo ntan akwi'riko noppa itti kwummo pap'rek. <sup>16</sup> Ana okkwi ipaik topon akwokorronno opakkot tuan itti kwathummo kret kothongku'rupakot. <sup>17</sup> Laka laraththa noul ioppepethe ana iokwonot. <sup>18</sup> Na'ra nga'rama othakka itti alon elli okonnoka nothuput thoricpo, <sup>19</sup> akka ul waccokot thiak kannan noma'ri men. Okin thaccokot thiak kannan nothiak ithakin thoccokothe ammakka Kapik koku'ret capu ncik, ana thoccokot thiak ammakka enthi thella p'rin. <sup>20</sup> Ana amma Kapik kakorronno orpet ma'ri men cik mothoccokot thiak, pul pella pakwentako. Anaruk nti ithocumorit thoul ia kwocumot tit, kwathikkienet

kin muththumuththut. <sup>21</sup> Ana noca'ri cen amma opilin pi'rehung itti, 'Okatha oMiccie pei' ana itti 'Okatha okkwe're ceneket,' nokorronno occikot lon len. <sup>22</sup> Akka ul wantan ii're itti okin oMiccie ngkarra ana ul woth-ernte lon loKapik ngkarra akkot lon ilommaththik akin ammikkot ul ngngin ana akin ammikkot manna ul ia Kapik kakkarot amma okin akkiothe kathar ikakin ammikkot kin ngngin. <sup>23</sup> Ittina no'rumoik mperenet non lon appik aca'ri cen carthuk anthan."

*Thao thokkul wopul iponyi*

(*Maththa 24.29-31; Lukka 21.25-28*)

<sup>24</sup> "Anaruk noma'ri imomakothe ma'ri mothiak 'ngi'rimak nga'roik,  
ana kwanok kakannupuka

<sup>25</sup> ana mothot mapukkwo ntothi'rot  
ana a'rupu worothi'rot wa'rıntittako ncik appik.'

<sup>26</sup> Ca'ri cen ul ionyi wimma ukul wopul iponyi anthan nti inuththe mpu'ran ana nthirik. <sup>27</sup> Ana kwathiöt u'rupa wothothilettat wung a'rntot okkwion ithakkarakot nno-capu ncik appik."

*Thongkene thopira popicıt*

(*Maththa 24.32-35; Lukka 21.29-33*)

<sup>28</sup> "Inenni nina lon lopira popicıt amma natha nopira popicıt iat ana anocokka, onon thina itti karran kakko napuththut. <sup>29</sup> Ittina amma onon thimmat lon len alokkattat onon thina itti lon len laik napuththupuththut. <sup>30</sup> Mpi'ret non icaricat itti lon elli lakkattat appik aul enni inenni warthuk ille. <sup>31</sup> Tothi'rot ana capu thintat cik anaruk lon lin lakorronno intat cik aththik."

*Okuccekotheik*

(*Maththa 24.36-44*)

<sup>32</sup> “Pul pella manna pina ca'ri cen ana cingki cen manna u'rupa wothothilettat woKapik ci tothi'rot womma ana manna ukul ngka kung ukul acakuruk womma, oththan pulluk akkina. <sup>33</sup> No'rumoik ana ikkoik ngkit thapat akka onon thomma itti ca'ri canthan acin. <sup>34</sup> Likkoik ere pul paik paeo imakkren, kwaththe nokaman kung, kwakwentot ul iarekinok iere ngen kurekkurek ana kwi'ret pul ipangwot cik nocürük itti kwangwot cik.

<sup>35</sup> Ittina no'rumoik akka onon thomma itti pul poruan pakkaprttako ntan acin, cipini ana amma okorronno oka cipin ana thampang thongk'rai, ana manna athak'ruk ooi ana manna ngi'rimak nthuput thorreri? <sup>36</sup> Amma ook akkat omolitorit korronno okorronnok itti kwathiot non inthe. <sup>37</sup> Ila ani'ret non, mpaik mperene ul appik, ‘Noccot kit cik.’ ”

## 14

### *Lon lothokkwot oleccuo*

*(Maththa 26.1-5; Lukka 22.1-2; Iuanna 11.45-53)*

<sup>1</sup> Anakka ma'ri mellat ncik me'ra mokamuthe koThaurrot kaman k'rek cik ana kamuthe karrakith iella mü'rükül tit, ul ittittik woul wonoppan toKapik ana ul iangkene lon lothonce'ret lon cik wokat cik akwantot kathar nthu'ran ikakin occokot oleccuo ngngin akin okkwothok. <sup>2</sup> Akin i'rekat itti, “Anaruk okorronno oka noma'ri mokamuthe akka ul urokie camutta.”

### *Oleccuo po'ruttathe ngaak noka'ran koPeththania*

*(Maththa 26.6-13; Iuanna 12.1-8)*

<sup>3</sup> Anakka oleccuo pokat cik noka'ran koPeththania tuan topul ipoccot k'ran itti oCamaan iponat inyi noka, akwothiingkatot kriki kothokkun wothokure iccik kokuppu'runng akwo'rkoik, apul ipopari akkakat ncu'ru caak iokkattathe no'ren wamutha ionat cekerek coppot ana panyathe cu'ru camutha ana punanthe oIeccuo ica.

<sup>4</sup> Ul w'rek iokat cik cinang wikkatheik aerettarne itti, “Ngintha akka ngaak ngamutha okittakinthet cik?  
<sup>5</sup> Ngaakettat nakucci woppot iekko akucci wothuput thulukku thopul iporekot aettat ul iaiak iella a'rupu cik.” Okin thothirriekathe pul ipopari cik kiththik.

<sup>6</sup> Aleccuo i'rekat kin itti, “Nokorronnok, thontha akka annattak? Kwokkinthin lon lopereththere. <sup>7</sup> Ul iaiak iella a'rupu w'rek wanon thaik annaththungon appinappin ana nthittarot kin noma'ri ima nthongothe itti nthittarot kin. Anaruk mpakannoka unaththungon appinappin. <sup>8</sup> Kwokkothe ila kwekkot nan kwakkot. Kwunotho ngaak ngamutha noka kin acik carthuk othakka itti akwokuc-centheth thocikkako thin cik. <sup>9</sup> Mpi'ret non lon ilaik icaricat na lon iloporot loleccuo ongkenettat nocapu ncik appik lon ila pul ipopari empi pokkothe lerettat cakuruk ana ul wakwarttikothok ngngin.”

<sup>10</sup> Ittina aIoutha Icikkariuththi opilin nti ip'rak ipatul ana ikken ke'ra oingkanthet ul ittittik woul wonopan toKapik akwothokerot kin oIeccuo. <sup>11</sup> Nili nopirakathe noka akka okin thocckithe lon elli ana okin thonekkekanthet oIoutha lon cik itti okin thethok akucci. Ittina oIoutha pikkatheik akwokwancot kathar ika akwoc-cokiethok nili ngngin.

*Thu'rit thoThaurrot kaman k'rek cik*

*(Maththa 26.17-25; Lukka 22.7-14, 21-23; Iuanna 13.21-30)*

<sup>12</sup> Noca'ri cocittokit cokamuthe karrakith iella mü'rükül tit, ammakka thathuma thokat itti okin thakkwot thungkat thothokinthe Kapik papu pouccük cik, aul iammakothok ipittathok itti, “Ngkwongothe itti nthathokkinthung cik kartha natho'rkot thu'rit thokamuthe koThaurrot kaman k'rek cik?”

<sup>13</sup> Ittina kwothiathe ul iammakothok we'ra akwi'rekat kin itti, “Ngkonon noka'ran koUruccelim ana onon thacurot ipul ipocura aponneko thongku'rong ngng'ri tit

annomakothok. <sup>14</sup> Ana na akwi'riko, ni'ret pul poruan itti, 'Pul ipangkene paik pipitto itti, Man min miatha imanin atho'rkot thu'rit tit thokamuthe koThaurrot kaman k'rek cik nul iammakothin?' <sup>15</sup> Kwakenenon man mittik maik to'ra mokuccettanthe cik kicce. Nokkinthe ka konnon cik nan."

<sup>16</sup> Aul iammakothok oingkat aeo noka'ran koUruccelim akin othiat lon ammakka oleccuo pi'rethe kin, akin okuccekat thu'rit thokamuthe koThaurrot kaman k'rek cik.

<sup>17</sup> Anakka cipin capot aleccuo akkakat nul wung iattul ana ikken ke'ra. <sup>18</sup> Manakka okin thokat cik akin othingkakot iriki kothokkun wothokure iccik kokuppu'ring kothu'rit akin o'rkoik, kwi'rekath kin itti, "Mpi'ret non lon ilaik icat opilin nti ianon pakeron, okkwi ipanin thaik tha'rkoik inaththe'ra."

<sup>19</sup> Okin thakorronno okakat thoporot noka akin ikkat cik akin i'rekathok thuluk thuluk itti, "Atti okorronno oka oun?"

<sup>20</sup> Akwi'rekat kin itti, "Opilin nti ianon ithattul ana ikken ke'ra. Okkwi ipanin thaik thathapettot nngucul nocaththak culukku inaththe'ra. <sup>21</sup> Ukul wopul iponyi wio ammakka lokurrakot iatham. Anaruk angkre nopul ipathocokiet ul ukul wopul iponyi. Laakat loporot amma pul pen pokat pakannokwonta."

### *Thu'rit tholli thocipin*

*(Maththa 26.26-30; Lukka 22.15-20; 1 Kurunthuc 11.23-25)*

<sup>22</sup> Anakka okin thokat cik akin o'rkoik aleccuo onekat arrakith akwopirakanthe Kapik noka akwomithat tit akwekat ul iammakothok akwi'rekat kin itti, "Nocco ka kin engki anno'rko."

<sup>23</sup> Akwonekat keththe'ret akwopirakanthe Kapik noka akwekat kin ana okin thikkathe nan appik. <sup>24</sup> Akwi'rekat kin itti, "Ngüccük ngin engi ngothonek ket lon cik nguntanthe ul cik woppot. <sup>25</sup> Mpi'ret non lon ilaik icat

itti mpakannappikko ngapak attang puccuk aca'ri cen akkakat amma anikko ingie ingili ngoKapik.”

<sup>26</sup> Manakka okin thongwot kinye akin oppat thapat akin oingkat ci noco'rong coCeththun.

*Oieccuo peret thocukkwo nolon thoPoththuruc*

*(Maththa 26.31-35; Lukka 22.31-34; Iuanna 13.36-38)*

<sup>27</sup> Aieccuo i'rekat, kin itti, “Onon appik thaththe naun, akka lokurrakot itti, ‘Mpakkwot pul ipu're lungkat ana lungkat lapettakot cik.’

<sup>28</sup> Anaruk amma mpurokot nti ithio mpaeo tokit kon noththok poCelil ana oron thincettot ceneket.”

<sup>29</sup> APoththuruc i'rekathok itti, “Okin thantoththe naung appik ana mpakorronno oththe naung.”

<sup>30</sup> Aieccuo i'rekathok itti, “Mpi'rehung lon ilaik icat itti athak'ruk tharthuk oo ngko'ra engi ma'ri me'ra ngkwacukkwo nolon itti ngkwoman ma'ri m'rapuruk.”

<sup>31</sup> Anaruk oPoththuruc popakkekatherit itti, “Oun manna pantio iraththe'ra mpakannocukko nolon itti mpomang.” Akin opakkekat tit menik appik.

*Oieccuo pa'ra nga'rama noka'ran koCaccimani*

*(Maththa 26.36-46; Lukka 22.39-46)*

<sup>32</sup> Akin oingkat noka'ran koCaccimani, aieccuo i'rekat ul iammakothok itti, “Nikkoik cene, ana'ra nga'rama.”

<sup>33</sup> Akwipat oPoththuruc ana oIakup ana oIuanna thellek, ana kwakorronno okakat poporot noka kannan ana oka piriin. <sup>34</sup> Ana kwi'rekathekin itti, “Thiak tho'rothin cik kannan ere mpio. Nikkoik cene annocot kit cik.”

<sup>35</sup> Akwoingkat papotteik akwapat nocapu akwa'rakat nga'rama itti, amma kathar akkokat cik aca'ri enci cothoc-cokot thiak opa'roik naak. <sup>36</sup> Akwi'rekat itti, “Appa,

ngappa pin, lon appik lippappat naung. Onekothin thoc-cokot thiak enthi, annoka ammakka mpongothe, anaruk ammakka ngkwongothe.”

<sup>37</sup> Anakka kwokkaprttakinēt ul iammakothok akwoth-iat kin akin thakko inthe. Akwi'rekat oPoththuruc itti, “Camaan, ngkwaik inthei? Ngkwakinnikkoik manna ngkīt thapat cingki culukkui? <sup>38</sup> Noccot kīt cik ana a'ra nga'rama othakka itti annokorronno apot ithennekketta. Cīkīt congothe anaruk ka kokinyat.”

<sup>39</sup> Akwappopakkat than akwa'rakat nga'rama ammakka mai. <sup>40</sup> Anakka kwokkaprttakot, kwaththiat kin inthe attang, akka kīt ken konat methe nan ana okin thom-makathe lon ilakin i'rethok.

<sup>41</sup> Akwokkaprttakat noca'ri ic'rapuruk akwi'rekat kin itti, “Ntharthuk thaik inthei ana ongokoi? Mekkot p'rin, ca'ri caat. Nokatha, ukul wopul iponyi waik wathoket-tat ul wolon ilokithak. <sup>42</sup> Nuroko ureo, okkwi ipaik pathokeron peei paat.”

### *Thoccokittat thoIeccuo*

*(Maththa 26.47-56; Lukka 22.47-53; Iuanna 18.3-12)*

<sup>43</sup> Anakka oIeccuo pokat cik akwere, aIoutha okkwi ipokat nti iul iattul ana ikken ke'ra akkakat. Kwokat ponat cungkut coul wonu i'rittang iukwit wukwit ana mu'rang. Okin thothilathe nul ittittik woul wonoppan toKapik ana ul iangkene lon lothonce'ret lon cik ana ul ittittik woul.

<sup>44</sup> Inenni okkwi ipathokeron pokenet kin itti, “Okkwi ipa anomicco i'rikothok topere, ook pen, annocokothok annipothok ciththan anno'rumo naak.” <sup>45</sup> Anakka oIoutha paat akwoingkat iccik koIeccuo akwi'rekathok itti, “Pul ipangkene,” akwomiccathok i'rikothok topere. <sup>46</sup> Ittina aul othakkarat iccik kung a'rumathok ac-cokathok. <sup>47</sup> Anaruk opilin pokat akwoco'ro pothathe

ki'rittang ikukwit nti ika'ruk akwokat pul iparekine pul iprik ponoppa toKapik kunu cik.

<sup>48</sup> Aleccuo i'rekat kin itti, “Onon thaata ni'rittang ana urong itti nthathocokothin ere pul pothu'rani? <sup>49</sup> Mpokat cik ianon appinappin anongkene ul noppa toKapik, ana onon thakorronno occokothin. Anaruk lon latham woKapik lonu itti lakkattat.” <sup>50</sup> Aul wung iammakothok ollat appik oththe naak.

<sup>51</sup> Ana pul p'rek poku'rit pokat cunthut ana poku'rupakotho kret noka tulluk appokat cik apommakat oIeccuo. Akka okin thocokotho pul pen, <sup>52</sup> akret apat apoththekat nan apollat cunthut.

*Oleccuo paik tokit kocuththun coul woIouth ittittik  
(Maththa 26.57-68; Lukka 22.54-55, 63-71; Iuanna 18.13-14, 19-24)*

<sup>53</sup> Okin thonekanthet oleccuo pul iprik ponoppa toKapik ana ul ittittik woul wonoppa toKapik appik ana ul ittittik woul ana ul iangkene lon lothonce'ret lon cik wa'rntakathe appik tothun. <sup>54</sup> Opoththuruc pomakathok nciththan mono oingkat ciki itha'rapak thokaman kopul iprik ponoppa toKapik. Kwikkatheik ceneket akwikot thik akin oul iangwot cik.

<sup>55</sup> Ul ittittik woul wonoppa toKapik ana cuththun coul woIouth ittittik appik wokat cik akwancot lon ilakin oruket oleccuo ngngin othakka itti akin okkwothok anaruk okin thakanniat lon l'rek aththik. <sup>56</sup> Okin thoppot ithorukwethok ngkarra anaruk lon len lokat kurekkurek.

<sup>57</sup> Apilingon urokat kapik, akin ikkat cik akin orukwethok ngkarra. Akin ere itti, <sup>58</sup> “Onin thocokotho akwere itti, ‘Mpakitto man moKapik emmi imuntat nyaun nyoul ionyi ana noma'ri m'rapuruk mpuno am'rek imakannunta inyaun nyoul ionyi.’” <sup>59</sup> Lon lothorukwet ngkarra then manna thokat kurekkurek.



<sup>60</sup> Apul iprik ponoppa toKapik urokat kapik tokit ken, akwipittat oIeccuo lon itti, “Ngkwaik pakannothinthet thorukwet tit itha ul enni waik warukwethung ngngini?”

<sup>61</sup> Anaruk oIeccuo pangkatheik kwakanni'rekat lon l'rek.

Apul iprik ponoppa toKapik, appipittathok itti, “Oung oMiccie ukul woKapik ikanin thaik thapirane noka pelleki?”

<sup>62</sup> AIeccuo i'rekat itti, “Ii oun.

Ana ngkwimma ukul wopul iponyi

aikkoik thokkun wothothari wokkwi ipakorronno  
alkakat

ana anthan nonuththe norothi'rot.”

<sup>63</sup> Apul iprik ponoppa toKapik illat kret kung akwo-kene thuaka thung, ai'rekat itti, “Oron thongothe ul im-mat lon ngkit arttot nan wothentha? <sup>64</sup> Onon thoccikothe ila kwocungkot Kapik ngngin. Onon thi're taththa?”

Akin i'rekat appik itti kwonu itti kwakkuttat. <sup>65</sup> Ittina apilingon ikkat cik akin othukkwothok nguk ana i'rikikothok kret toca akin okkwekok akin i're itti, “I'rethenin mpu'ran poKapik, oththa akkokkworung?” Ana ul iangwot cik wonekathok ana wokkwekathok.

*OPoththuruc pocukkot naleccuo*

*(Maththa 26.69–75; Lukka 22.56–62; Iuanna 18.15–18, 25–27)*

<sup>66</sup> Anakka oPoththuruc pokat cik parthuk itha'rapak apilin nti iul iari iarekine pul iprik ponoppa toKapik akkakat akwoppo cinang. <sup>67</sup> Manakka kwimmat oPoththuruc akwikot thik akwokathakathok papenang.

Akwi'rekathok itti, “Oung cakuruk pokat annoIeccuo poNaccir.”

<sup>68</sup> Anaruk akwocukkwat nan, akwi'rekat itti, “Mpomma lon ila ngkwaik peret.” Akwoingkat icuruk thapat.

<sup>69</sup> Anakka ukul iopari iareko wapprimmathok cĭnang, appi'rekat ul iokat cik cĭnang aco'ro itti, "Opaththi empi ook opilin ntiakin." <sup>70</sup> Akwappocukkat nan.

Ana papotteik, akin ithokat cik akin oco'ro napuththut i'rekat oPoththuruc itti, "Īcat oung opilin pen akka oung poCelil."

<sup>71</sup> Ittina kwikkatheik akwonane ka kung thattatta ana kwarmakanthet kin itti, "Mpomma pul emprĭk ipanon thaik theret."

<sup>72</sup> Nci cĭnang athak'ruk othikkiekat ma'ri me'ra athoo, ittina oPoththuruc okwarikat ila oIeccuo pi'rethok itti, "Amma thak'ruk tharthuk oo ma'ri me'ra, angkwacukko nan itti ngkwinan ma'ri m'rapuruk." Akwokwarikat lon len akwikkat cik akwoo.

## 15

### *OIeccuo paik tokit koPilaththoc*

*(Maththa 27.1-2, 11-14; Lukka 23.1-5; Iuanna 18.28-38)*

<sup>1</sup> Ana ngorrot ngi'rimak ul ittittik woul wonoppan toKapik okin oul ittittik woul ana ul iangkene lon lothonce'ret lon cik ana cuththun coul woIouth ittittik appik i'rikat lon akin i'rikikkat oIeccuo akin onekanthok ili oPilaththoc.

<sup>2</sup> APilaththoc ipittathok itti, "Oung ili woIouthi?"

AIeccuo othĭat tit itti, "Laik ammakka ngkwi'ret."

<sup>3</sup> Aul ittittik woul wonoppan toKapik orukwekathok llon loppot. <sup>4</sup> APilaththoc appipittathok attang itti, "Ngkwaik pakannothĭntheit ul enni tiri? Antokatha lon loronththa ilakin thaik thorukwethung ngngin."

<sup>5</sup> Anaruk oIeccuo pakannothĭat tit aPilaththoc opt-takat tit.

### *OIeccuo pakkmakot nthokkuttat*

*(Maththa 27.15-26; Lukka 23.13-25; Iuanna 18.39-19.16)*

<sup>6</sup> Ittina thathuma thokat cik nokamuthe koThaurrot kaman k'rek cik itti nili nelikko pul nti ikorrkkor ipa ul ipitto itti pelikkako. <sup>7</sup> Ana pul p'rek pokat cik ikorrkkor ipoccot k'ran itti oParapac akin oul ionu thukungkun ithokat thongwothe ul icamutta. <sup>8</sup> Acungkut coul akkakat acipittat oPilaththoc itti kwakkinthet kin ammakka akwokkettet appinappin.

<sup>9</sup> APilaththoc ipittat itti, “Onon thongothe itti mpe-likkinenon ili woIouthi?” <sup>10</sup> Kwappina kicce itti ul ittittik woul wonoppa toKapik wokat wonanok oIeccuo akka okin thokat thua ka kung. <sup>11</sup> Anaruk ul ittittik woul wonoppa toKapik werekekathe ul itti akin ipittot oPilaththoc itti akwelikkinekin oParapac.

<sup>12</sup> APilaththoc ipittat kin attang itti, “Mpakkot taththa nopul ipa annakkaro itti ili woIouth?”

<sup>13</sup> Akin i'rekat mpo're citta itti, “Nokkwethok nothapak.”

<sup>14</sup> OPilaththoc ipittat kin itti, “Akaintha ngintha akka kwokkothe pamoloko?”

Anaruk okin thikkatheik akin okkot po're citta akin i're itti, “Nokkwethok nothapak.”

<sup>15</sup> OPilaththoc pangkathe itti kwapirie ul noka ana kwelikkanthet kin oParapac. Akwothiat oIeccuo akwothopoko ana okkuttat nothapak.

*Ul irro wakkot ngure naleccuo*

*(Maththa 27.27-31; Iuanna 19.2-3)*

<sup>16</sup> Ul irro wonekathe oIeccuo noka'ran koili ikrik ana okin thakkarathe mungkut moul irro appik <sup>17</sup> Akin akiekathok kret kothlo ere maa ika nili ako, akin oheranthok tukwia toli, akin akiekathok ica ere ili. <sup>18</sup> Akin ikkat cik akin akkakarok itti, “Ili woIouth, taththa.” <sup>19</sup> Akin okkwekok ca ngkurrong ana othukkwethok nguk ana irrinok cik nungku akin innikot itti nthar'ranok nga'rama.

<sup>20</sup> Anakka okin thocothothe okkothok ngure naak kicce okin thuekathok kret ikothlo ere maa akin akiekathok kret kung akin ipathok thapat akin othokkwethok nothapak.

*Thokkwot oIeccuo nothapak*

*(Maththa 27.32-44; Lukka 23.26-43; Iuanna 19.17-27)*

<sup>21</sup> Ana ikathar akin ocurat iaCcamaan ponoka'ran koKirin akkwokat oththan pAlekenther ana oRuppuc. Kwokat akwoppo cinang akwanthan nti ipira thapat akweo icarak coman ana ul irro wonekiekathok thapak mpu'ran. <sup>22</sup> Akin onakat oleccuo noka'ran ikoccot k'ran itti Culucutha, (ilonu itti ka'ran kok'rintil koca). <sup>23</sup> Akin oIeccuo ngapak ngonu a'rupu w'rek tit apiet thok'rellako thoka cik anaruk kw'rakathe. <sup>24</sup> Ana okin thokkwekathok nothapak

ana okin thillillathe iret wung

nthokkwot mo'rio nan akin okatha itti okkwen akkaneko kia.

<sup>25</sup> Akka okin thokkwethok nothapak aciŋki cokkothe ukullaco'rin cocik corrot. <sup>26</sup> Lon ilakin thorukwethok ngngin lokurakathe no'ra wothapak itti, ILI WOIOUTH.

<sup>27</sup> Okin thongwathe ul wothu'ran nothapak we'ra okin aththungon opilin thokkun wothothari ana opilin thokkun wothokure. <sup>29</sup> Ana okin ithokat cik akin okkette cinang thikkatheik akin ocungkok ana o'rintitto ma ana erenok itti, “Oung ipaik pathokitto tupan toKapik auno noma'ri m'rapuruki? <sup>30</sup> Orpu ntan nnothapak a'ret ka kang.”

<sup>31</sup> Ana cakuruk ul ittittik woul wonoppa toKapik ana ul iangkene lon lothonce'ret lon cik nerettaranthet akin okkot ngure naak akin i're itti, “Kwo'rethe ul w'rek anaruk kwomma o'ret ka kung. <sup>32</sup> Kirrnni aMiccie empi poIccereil

orpo ntan nothapak othakka itti unimma unocokot lon lung nomikit.” Okin ithokkwettathe nothapak akin aththungon thikkatheik akin ocungkok cakuruk.

*Thio thoIeccuo*

*(Maththa 27.45–56; Lukka 23.44–49; Iuanna 19.28–30)*

<sup>33</sup> Anakka cingki angko ippa ngi'rimak ngo'ratheik nocapu ncik appik puccuk mono acingki okkat c'rapuruk cipin. <sup>34</sup> Ana nocingki c'rapuruk cocipin cen aleccuo eekat ngeme mpo're cittan itti, “Eloi, Eloi, lama capakthhani?” ilonu itti, “Kapik kin, Kapik kin ngkwoththet naun akaintha?”

<sup>35</sup> Anakka ul w'rek iokat cik aco'ro cinang wocikothel lon len okin thakanninakat lon len akin i'rekat itti, “Nokkwo kunu ncik kwaik pakkaro pul ipernte lon loKapik ollia.”

<sup>36</sup> Apilin ollat mono okwothonakat kret akwothapekat nnggapak ingor akwonekkekat nokwo'ren akwekat oIeccuo itti kwikko. Akwi'rekat itti, “Ntrun antokorronnok pellek unokatha amma ollia anthan akworpethok cik nothapak.”

<sup>37</sup> Aleccuo othukat cokwa mpo're cittan akwommotakat.

<sup>38</sup> Akret ikapettoik konoppa toKapik illakat tit mprak we'ra, ncik to'ra mono uat ciki nocapu. <sup>39</sup> Anakka ili woul arrial ukuluk irro iokat cik aco'ro tokit koIeccuo wocikothel akka kwet ngeme ana akka kwiot akwi'rekat itti, “Icat pul empi pokat ukul woKapik.”

<sup>40</sup> Ul iari w'rek wokat cik, akathacceik nciththan. Ana nti iakin oMeriom moMacthelia, ana oMeriom onnan polakup ipotte ana poluccip, ana oCcaluma. <sup>41</sup> Ul iari enni akkommakothok ana ittathok akka kwokat noththok poCelil. Ul w'rek iari wokat cik cakuruk woppot iomakothok ntan noka'ran koUruccelim.

*Thocikkaro thoIeccuo**(Maththa 27.57-61; Lukka 23.50-56; Iuanna 19.38-42)*

<sup>42</sup> Ca'ri cokat cik cothokuccekot cik (ilonu itti aca'ri caCcepith carthuk anthan). Manakka cipin cokat cik acapo, <sup>43</sup> oluccip poRami ipokat iprik icuththun coul woIouth ittittik ana ipokat cik akwo'rikot ngili ngoKapik, poingkanthet oPilaththoc ella n're akwipittathok kumi koleccuo. <sup>44</sup> OPilaththoc poprttakathe tit akka kwocikothe itti oIeccuo piot akwakkarat ili woul irro ana kwipittathok itti amma oIeccuo piot akkumman. <sup>45</sup> Anakka kwinat lon len noili woul irro itti oIeccuo piot akwekat oluccip kumi koleccuo. <sup>46</sup> Ittina oluccip pokerathe kret kie akwo'remethekathok ngngin ana kwaththocikkathok ippu ipa'ranthang pocu'rol. Akwothiat ka'raccak tocürük coppu. <sup>47</sup> OMeriom moMacthelia ana oMeriom onnan poluccip thimmakathe na kwocikkakot.

## 16

*Thuroko thoIeccuo nti ithio**(Maththa 28.1-8; Lukka 24.1-12; Iuanna 20.1-10)*

<sup>1</sup> Anakka ca'ri caCcepith ceot ncik, oMeriom moMacthelia ana oMeriom onnan polakup ana oCcaluma thokerathe ngaak ngamutha itti okin thatho'ro kumi koleccuo.

<sup>2</sup> Ana ingi'rimak noca'ri corokit noma'ri ime're'rapuruk acingki coppot ana okin thokat cik nokathar akin eo thoppu, <sup>3</sup> akin ikkat cik akin ipittararot itti, "Oththa akkapa'renerit pothok cik noppu?"

<sup>4</sup> Anaruk akka okin thokathat cik akin immakat pothok ipokat pittik appopa'rettat cik noppu. <sup>5</sup> Manakka okin thi'rikot ippu akin immakat pul poku'rit pakot kret kipuk apikkoik nthokkun wothishari woul iari ana okin thipathe n're.

<sup>6</sup> Api'rekat kin itti, “Nokorronno opelle. Onon thaik thakwancot oIeccuo poNaccir ipokkwuttathe nothapak, okkurokot nti ithio kwakannoka cene nokatha ka'ran nakin thaththicethok cik. <sup>7</sup> Anaruk ngkonon annothi-ret ul iammakothok ana oPoththuruc 'kwaet tokit kon noththok poCelil anon tharthuk eo nanon othimmathok ammakka kwi'rethenon.’”

<sup>8</sup> Akin ikkat cik akin okkweka ana oprttakot tit akin oppat thapat akin ollat nti ippu ana okin thakanni'rekat opilin akka okin thonat n're.

*OIeccuo pumminthet oMeriom moMacthelia  
(Maththa 28.9-10; Iuanna 20.11-18)*

<sup>9</sup> Anakka oIeccuo purokot ngi'rïmak noca'ri corokit conoma'ri me're'rapuruk kummanthet oMeriom moMacthelia ncik cittokit okkwi ipa kwokicet u'rupa iokithak we're'rapuruk ntit. <sup>10</sup> Kwoingkathe ana kwaththerekanthet kin ithokat akin oIeccuo ithokat ithemeru ana oo. <sup>11</sup> Anakka okin thoccikothe itti oIeccuo purokot ana itti kwimmarok okin thakannocokat lon len nomikit.

*OIeccuo pumminthet ul iammakothok ncik  
(Lukka 24.13-35)*

<sup>12</sup> Apotteik aIeccuo appummanthet kin the'ra noul iokat cik ammakothok ngka prek, akka okin thokat cik akin onyaro icarak coman. <sup>13</sup> Okin thopakathe akin erekanthet opilingon anaruk okin thakannocokat lon len nomikit.

*OIeccuo pumminthet okin ithattul ana ikken culukku  
(Maththa 28.16-20; Lukka 24.36-49; Iuanna 20.19-23; Ngre 1.6-8)*

<sup>14</sup> Noma'ri motte aIeccuo ummanthet ul iammakothok iattul ana ikken culukku akin thokat cik akin o'rkoik, akwothirriekat kin cik akka okin thellat thocokot lon nomikit ana thonthomat mikit men akka okin th'rat

occikot lon lokkwion ithimmarok akka kurokot ntiti nti ithio.

<sup>15</sup> Kwi'rekathē kin itti, “Ngkonon nocapu ncik appik annothongkene ul appik lon iloporot loKapik. <sup>16</sup> Okkwi ipocokothē lon iloporot nocikit anaocco mamuthie kwa'rettat ana okkwi ipakannocokot lon iloporot nocikit kwakmakō. <sup>17</sup> Ana ul iocokothē lon loKapik wakkot lon ilommathtik, okin okicce u'rupu iokithak ngk'ran kin ana okin there karru koul w'rek. <sup>18</sup> Okin thaccicokot inyil nyaun nyen ana ikko ngee iokithak angokorronno okkot kin lo'rek, okin thanekket nyaun noul iongo ana wathakka woporot.”

*Oieccuo ponekittathe tothi'rot*

*(Lukka 24.50-53; Ngre 1.9-11)*

<sup>19</sup> Anakka Ili oieccuo perenet kin kwonekittakathe tothi'rot ana kwikkatheik thokkun wothothari woKapik.

<sup>20</sup> Aul iammakothok oingkat athongkene na'ran appik ana Ili wrekathē akin aththungon ana kwokenekathe itti lon lung laik icat llon ilommathtik ilakin thokat akin okkot.



Lumun  
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243fae000